

Ni been ree xi Apóstoles Jesucrist

¹ Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēēman chi guzuloj xchiinman

²xt chi ziaman xanyabaa. Chi gadaman yaguij, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman.

³Chi mal guzagdiaj da'taman loj xguialgüjtaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabancaman. Dxej zii ree guneenēman laa reeman xcwent xguialrniabee Dios.

⁴Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi.

⁵Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c guialrirobnijs par lējt.

Zia Jesús xanyabaa

⁶Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül guialrniabee loj ree bēn Israel ya?

⁷Badxi' Jesús san rēbaman:

—Ad lëjtit rayal gagbee xhie dxejn o xhie horan gac zian. Tijbzi da Dadan ragbee laan din laaman ca' guialrniabee.

⁸ Per chi ma nabannëdi xSprijt Dios, tia'di guialrniabee. Dxel griidi chiguiedi diidx loj ree bën Jerusalén chu najn, në gra ree guiedx riga' niz Judea në niz Samaria, xt ree guiedx ren ni riga' ree zijt da't.

⁹ Gulox guneeman, ruguiaa reeman laaman dx-ejlczi wajsaman ziaman xanyabaa, abi' biguiajt tijb bëj bata'cwan laaman, dxel ad baguiaatri reeman laaman.

¹⁰ La'tgaj ruguiaa reeman ziaman xanyabaa, gulentie tio'p ree bën najcw lajd naquich lod za' reeman,

¹¹ abi' rëb reeman loj ree apóstoles guin:

—Bën Galilea, ¿chexc zeel sta ruguiaadi xanyabaa? Jesús, bën baguiaadi zia xanyabaa, laagajcaman yaguaaad stijb, zi'cgajc baguiaadi ziaman.

¹² Chi baza ree xi apóstoles Jesús ruguia' la Olivos, guza reeman zi'ct rza reeman dxej razi-iladx reeman, persi badxin reeman Jerusalén.

¹³ Chi badxin reeman, wë'p reeman lënü ladya lod zojb reeman. Brii laj reeman Bëd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bën guzunë ree bën cananistas), në Judas xi'n Jacob.

¹⁴ Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree béngunaa ren.

Gulej reeman bën baya'n xluar Judas

15 Lën ree dxej zii bado'p ree bén riladx Jesús, naj reeman cost tibgayuu gajl bejn, dxel guzuli Béd galay reeman, rëbaman loj reeman:

16 —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bén gunaaz laaman,

17 gojqix tijb dux compniaran, në laax been lasa' dxiin raguieenan.

18 Per con milia ni gudix reeman laax por ni mal beenx, bio' guidxliuj lod gudidya'x, bazuj guijqix, goxya'x abi' brii gra xziix.

19 Chi gogbee gra ree bén Jerusalén ni goc, gunee reeman guidxliuj zii Acéldama, rën guiëban guidxliuj rejn.

20 Din rëb loj libr la Salmos:

Yaya'n dëjch lidxix,
achutziri cwe lënan.
Rëb tëë lojn:

Yayu ben ren guia'x.

21 'Zeel loj gra ree bén za'në dunuj ree guidib tiamp ni guzunë Jesús dunuj ree,

22 diizd chi baroobnijs Waj laaman xt chi ziaman xanyabaa. Loj gra reeman rayal grii tijbaman din güünman dunuj ree yudar yaguie'ch ree loj ree bejn guial walican babanman loj ree bengüt.

23 Dxel gulej reeman tio'p reeman: tijb bén la Xiëb (rniee reeman laaman Barsabás, rniee tëë reeman laaman Justo), gulej tëë reeman bén la Matías.

24 Dxel gurejdx gunab reeman Dios, rëb reeman:

—Dad, lüj nünbee luxdoo gra ree bejn. Balüü chu loj grop reeman gulejl

²⁵ din gacaman apóstol luar Judas, din banijtix delant lojl por dol ni beenx abi' ziax luar ni rayalix.

²⁶ Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

2

Biguiajt xSprijt Dios diizd xanyabaa

¹ Chi bidxin dxej gojl lanij la Pentecostés, gra ree bén rliladx Jesucrist bado'p tijbzi luar.

² Dxejlczi gojc naquie' xanyabaa zi'c bidoxh xt bayu bi lēnü lod riga' reeman,

³ abi' gulentie zi'c bajl dobēz ree, biguiajt reen guijc tijb gaj reeman.

⁴ Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

⁵ Lēn ree dxej zii za' zien ree bén Israel Jerusalén, baza reeman gra ladczi din cwedx guiniab reeman Dios.

⁶ Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rniece gra ree bén rliladx Jesús xtiidx tijb gaj reeman, ad badxejlt xgab nūjn reeman.

⁷ Dád badxa loj reeman xt ni'quid badxejlt xhie nūjn reeman, abi' gunabdiidx loj lasa' reeman rēb reeman:

—¿Nid bén Galilea gra ree bén canee guin ya?

⁸ ¿Chexc zeel raguiejn ree rniece reeman dux tiidx ree?

⁹ Du loj ree no'ch ree b́en źeed guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor;

¹⁰ b́en źeed t́eē ree guiedx riga' ree niz Frigia, Panfilia, Egipto, nē ree guiedx nulen Libia ni riga' ree gajxh Cirene, nē ree b́en źeed Rom, yu' reeman gojl Israel per naban reeman Rom, yu' t́eē reeman naj quijb ben Rom per rliladx reeman ni rliladx ree b́en Israel.

¹¹ Nē ree b́en źeed niz Creta nēt́eē ree b́en źeed guiedx riga' ree niz Arabia no'ch du loj ree. ꝑPer dugraczi ree caycaagdiajg con dux tiidx ree niza'cdxoon ŕujn Dios!

¹² Graczi reeman badxa da't loj xt ni'quid badxejlt xgab ńujn reeman, abi' guzuloj canabdiidx loj lasa' reeman ŕeb reeman:

—¿Xhie ŕen guiēb gra ni guie?

¹³ Per garol reeman baze' laa reeman, ŕeb reeman:

—Rē' reeman.

Ni ŕeb B́ed loj ree bejn

¹⁴ Dxel guzuli B́ed con zachibtib ree apóstoles guin, guneeman rejs ŕebaman:

—Lējt b́en Judea nē graczi ree b́en zojb Jerusalén, gol bacaagdiajg gol bignia' t́eē ni ganin.

¹⁵ Ad ŕe't ree b́en guin zi'c naladxidi, din qui gojlri raca gaa rsil.

¹⁶ Guie cayajc cumplid ni guneē b́en brii laj Joel, b́en badēē xtiidx Dios loj ree bejn, chi ŕebaman:

¹⁷ Na Dios,
guidxin dxej gaxhal da Sprijtan luxdoo gra ree bejn,

abi' xi'ndi xinguaaw con biingunaa gudëed reex
da diidxan,
zien ree ni gulüüloj loj ree xinguiag,
guiáad ree bengol zien ree ni guinie'xchaal ree-
man.

18 Dxej zii ree gaxhal da Sprijtan luxdoo ree bén
rüjn da dxiinan,

xinguaaw ree në ree béngunaa,
abi' gudëed reeman da diidxan.

19 Gulün sen ree xanyabaa ni yadxa lojdi,
guiáad loj guidxliuj gulün sen ree
zi'c rejn në bajl nètëë go'xh.

20 Guicajy loj gubijdx, guiáad bëëw yayajcan zi'c
rejn.

Chi ma gojc zian, dxel guidxin quijb dxej guin,
dxej za'cdxoon gui't Dios bén rniabee,
dxej guiguien guidib xbianiman.

21 Abi' graczi ree bén cwedx guiniab laaman
güünman laa reeman perdon.

22 Rëb tëë Bëd loj reeman:

—Yan, gol bacaagdiajg ni ganin lëjt bén Israel:
Lëjt ragbee guial Jesús bén Nazaret najman bén
guxhaal Dios, been tëëman milagr ree në ree ni
radxa loj ree bejn zi'c sen din gagbeedi guial Dios
guxhaal laaman.

23 Diizd gocli mal nüjn Dios xgab guial zian
güünnëdi Jesús, gunaazidi laaman bayüdi laaman
loj ree benmal, din gugüjt reeman laaman loj
crüjz.

24 Per basban Dios laaman stijb, babëëman laa-
man loj guialgüjt, din ad gojct nutëë guialgüjt guin
laaman.

25 Chi gunee rey Davi xcwent Jesús, rëbaman:

Zianczi baguian dux Dad ree Dios za'nëman naj.
Za'man da ladbeen, achetczi zajc guchejb naj.

²⁶ Zeel yu' luxdon nix, ruzat tën Dios zagdxe.
majsi guiëtan ad rdxebtan,

²⁷ din ad zusa'ntil naj lën baa,
ad zatiëjbtıl xhin xcuerp xi'nl bën naya nali.

²⁸ Balüül naj nejz runee guialnaban,
chu' tëë luxdon zagdxe guial guibannël naj.

²⁹ Basnuu gunee Bëd, rëbaman:

—Ganin loj gradi compniar, diidxiczi dux
béngulal ree Davi güjtaman biguie'ch tëëman, abi'
laa xbaaman sta raguiaa ree yan.

³⁰ Per gojcaman bën badëë xtiidx Dios loj ree
bejn, abi' gogbeeman been Dios promejs guial loj
xdiaaman grii Cristo bën nabee.

³¹ Rulüü ma cuguiaaman gra ni gac, rëbaman
guial yaban Cristo loj ree bengüt, ad zaya'ntaman
lën baa ad zaxin tëët xcuerpaman.

³² Yan ma basban Dios Jesús, dugran nayajc
testiw guial walican babanman.

³³ Zia tëëman xanyabaa zisobaman xladbee
Dios, persi badëë xSprijt Dios lojman zi'c ma
rëbaman, yan ma guxhaal Jesús Sprijt guin
loj guidxliuj, por laaman cayajc ni cuguiaadi
caguiejn tëëdi.

³⁴ Ad Davitan zia xanyabaa, din laagajcaman
rëb:

Rëb dux Dad ree Dios loj bën rniabee naj:

“Gurej da ladbeen,

³⁵ xt gabecan xin rdxe'ch ree lüj guia'l.”

³⁶ 'Gradi bën Israel gol gogbee guial Jesús bën
bacaadi loj crüzj, Dios bacaabee laaman din gaca-
man Dad, bën nabee dunuj ree.

Bachajg zien ree bejn bén rliladx ree Jesús

³⁷ Chi biguiejn ree bén riga' yagaj ni rëb Bëd, dád guyu naya luxdoo reeman. Abi' gunabdiidx reeman lojman në loj los demazri ree apóstoles guin, rëb reeman:

—Dad, gol guna, ¿xhie rayal yaguieenan?

³⁸ Dxel rëb Bëd loj reeman:

—Gol bayagbee xtolidi, gol badxi' tée lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi.

³⁹ Din promejs guin naj par lëjt në par ree xi'ndi në par gra ree bén riga' zijt, par gra ree bén cwe Dios par laaman.

⁴⁰ Con ree diidx guie në mazri ree diidx ren guneenë Bëd laa reeman, rëbaman:

—¡Gol bariica loj ree bén rüjn ni mal!

⁴¹ Zian gojc, graczi bén bazoob diidx ni rëbaman gurobnijs. Dxej zii gajc bachajg cost choon mil bejn bén rliladx ree Jesús.

⁴² Graczi reeman binal ni balüü ree xi apóstoles Jesús laa reeman, gubajnnë lasa' reeman zagdx, gurejdx gunab reeman Dios abi' rado'p reeman persi raw reeman guiadxtil tijbzi zi'c gunabee Jesucrist güün reeman.

Ze gubajn ree bén bililadx Jesús yaløj

⁴³ Graczi ree bejn radxa da't loj milagr në los demazri ree ni been ree apóstoles guin.

⁴⁴ Graczi ree bén bililadx Jesucrist gubajnnë lasa' zagdx, rgui's tée ni rajp reeman loj lasa' reeman.

⁴⁵ Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman.

⁴⁶ Guixie guixie rado'p reeman lën yadooro' Jerusalén, dxel raguij reeman lidx xcompniar reeman rtaw reeman, dád nix yu' luxdoo reeman rën tëë lasa' reeman,

⁴⁷ ruza't reeman Dios zagdxe, guiáad gra bejn guyën laa reeman. Guixie guixie ragnë Dios din gacxhiey mazri bën rliladx Jesucrist, persi gojc xtol reeman perdon.

3

Bayajc tijb bën ad rajct rza

¹ Tijb dxej zë ree Bëd con Waj lën yadooro' Jerusalén raca choon wadxe, hor zii naj hor ni rbejdx rniab reeman Dios.

² Ro' xport yadoo guin zojb tijb bën ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bën ru lën yadoo guin.

³ Chi baguiaaman Bëd con Waj ma chu' reeman lën yadoo guin, gunabaman carda loj reeman.

⁴ Baguiaa reeman lojman, dxel rëb Bëd lojman:
—Baguiaa du lojn.

⁵ Chi biguiejnman rëb Bëd zian, dxel baguiaaman loj reeman, naladxaman milia nudëed reeman lojman.

⁶ Per rëb Bëd:

—Ad ra'ptan plajt ni'qui or par gunen lojl, per ni zajc gūnan por lūj gūnanan: Por xguialrniabee Jesucrist bën Nazaret, guzuli, guza.

⁷ Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl,

⁸ abi' gutiajsaman, guzuliman guzuloj cazaman. Dxel guyunëman laa reeman lën yadoo guin, cazaman, catiajsaman cuza't tēëman Dios zagdxe.

⁹ Graczi ree bën cuguaa laaman cazaman cuza't tēëman Dios zagdxe,

¹⁰ dád badxa loj reeman bidxeb tēë reeman guial gojc zian guial nünbee reeman bën guin, ragbee tēë reeman laaman rbej ro' xport yadoo guin ni la Port Za'cdxoon, rniabaman carda.

Gunee Bëd loj ree bejn lod la xcurdur Salomón

¹¹ Ad riro'nladxt bën bayajc guin Bëd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Bëd con Waj.

¹² Chi baguaa Bëd zian, rëbaman loj reeman:

—Bën Israel, ¿chexc zeel radxa lojdi ni goc? Ad naladxidi por dunujn rza bën guie guial naca'n guialrniabee o guial nayajcan naya delant loj Dios ya.

¹³ XDios dux béngulal ree Abraham, Isaac në Jacob, laaman badëë guialrniabee loj Jesús, bën bayüdi loj guxtis. Abi' chi guyën Pilato nuslaaman laaman, ad cwëjbtidi.

¹⁴ Luar niniabidi nuslaa Pilato bën naya nali, bën rüjn zi'c rayal, gunabidi baslaaman tijb xin bagüjt bejn.

¹⁵ Zian bagüjtidi bën runee guialnaban. Per basban Dios laaman stijb, abi' dunujn nayajc testiw guial babanman.

16 Bén guie, bén ruguiaadi nünbee täädi, guyu gojl guia'man por xguialrniabee Jesucrist, bayaj-caman guial baliduladxan, zi'c ruguiaa graczi.

17 'Ganin lëjt compniar, ragbeen guial lëjt con ree bén rniabee lëjt ni'quid gogbeetidi xhienin beendi chi bagüjtidi Jesús.

18 Per zian been Dios persi gojc cumplid ni rëbaman loj ree bén badëë xtiidxaman loj ree bejn diizd gocli guial sagdiaj Cristo.

19 Zeel gol bayagbee xtolidi gol badxi' tää lojdi loj Dios din güünman xtolidi perdon. Dxel yayaalyuj luxdoodi,

20 guixhiaal tääman Jesús stijb, bén naj Cristo diizd gocli par lëjt,

21 majsi yan rayalri suman xanyabaa, xt ma bazuxnejz Dios gra, zi'c rëbaman loj ree bén badëë xtiidxaman loj ree bejn diizd gocli, bén gubajn ree naya delant lojman.

22 Abi' rëb Moisejs loj ree dux béngulal ree: “Loj xdiaadi cwëë Dios tijb bén gudëë xtiidxaman loj ree bejn zi'c naj, gol bazoob xtiidxaman graczi ni naman lojdi,

23 din graczi ree bén ad zuzoobt xtiidxaman nit reeman, ad zajc täätri reeman cwent zi'c xbejn Dios.”

24 'Gra ree bén badëëd xtiidx Dios loj ree bejn, diizd Samuel con los demazri ree bén badëë xtiidx Dios diizd gulal, mal bagojn reeman ni cayajc ree lën ree dxej guie.

25 Lëjt naj xdiaa reeman, lojdi gac cumplid ni cwëb Dios loj ree dux béngulal ree chi rëbaman loj Abraham: “Por xdiaal günle'n gra ree bénguidxliuj.”

²⁶ Abi' chi basban Dios xi'nman Jesucrist, yaloj lojdi guxhaalaman laaman din güünle'man lëjt din yabëecaman gradi loj ni mal rüjndi.

4

Bazuj reeman Bëd con Waj loj ree guxtis

¹ Sta canee ree Bëd con Waj loj ree bejn, chi bidxin ree xbixhioz ree bën Israel në suldad rniabee suldad rniaj ree ro' yadooro' Jerusalén, nëtëë ree bénsaducew.

² Dád ralen reeman guial culüü ree Bëd con Waj bejn ree, rëb reeman guial yaban ree bejn loj ree bengüt, din laan ma baguiaa reeman chi baban Jesucrist.

³ Zeel gunaaz reeman laa reeman, per guial ma gudxe, zeel badxe' reeman laa reeman ladxguiib la'tgaj rareguiaal.

⁴ Per dád zien ree bën bacaagdiajg ni rëb ree Bëd con Waj bililadx xtiidx Dios, gojc reeman cost gaay mil xinguaaw xcwentqui ree bégunaa.

⁵ Chi bareguiaal, guxtis Jerusalén në ree bengol në ree mextr rulüü ley, bado'p reeman loj ciuda guin.

⁶ Në Anás bidxin yagaj, bën naj bixhioz mazri zobjloj rniabee graczi ree bixhioz, bidxin tëë bixhioz la Caifás në Waj në Lejandr, nëtëë gra ree bën naj lasa' ree bixhioz rniabee guin.

⁷ Gunabee reeman bica' reeman Bëd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rëb reeman:

—¿Chu banee diidxbee o chu por rüjndi ni guin?

⁸ Per guial yu' xSprijt Dios luxdoo Béd dád gognëman laaman, zeel rëbaman:

—Gol bacaagdiajg ni ganin lëjt bengol në lëjt guxtis,

⁹ rniabdiidxidi dunujn xhienaag baguieenan béngogxuu guin yudar, xhie tëë naag gojc zeel bayajcaman.

¹⁰ Yanan lojdi din gagbeedi gagbee tëë gra bën Israel xhienaag bayajc bën za' lojdi. Bayajcaman por xguialrniabee Jesucrist bën Nazaret, bën ba-caadi loj crüjz abi' basban Dios laaman stijb.

¹¹ Beennëdi laaman zi'c rüjn ree bën rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacnë yu guin.

¹² Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din güünman dunuj ree perdon.

¹³ Chi baguiaa ree guxtis guin ad rdxebt ree Béd con Waj guial rniee reeman, abi' gogbee reeman ad bën basiidt ree mazran achu tëët naj reeman, badxa loj reeman bayünbee tëë reeman laa reeman guial bën binal ree Jesús.

¹⁴ Abi' yagaj gajc za' bën bayajc guin, zeel ad bile'tri xhie niëjb reeman contr laa reeman.

¹⁵ Dxel gunabee ree guxtis guin barii ree Béd con Waj din yaya'n laaz reeman din gü reeman diidx.

¹⁶ Rëb reeman:

—¿Xhienaag yaguieennë' ree xin guin ree? Graczi ree bën Jerusalén ma ragbee milagr been reex. Abi' ad zajct yarexuu ree.

¹⁷ Per chitëë guire'ch xtiidx Jesús, yachejb reex din diizd yan achutcziri loj guza't reex laax.

18 Dxel gurejdx reeman laa reeman gunabee reeman chitëe churi loj guza't reeman Jesús, ad gulüü tëeri reeman xtiidxaman.

19 Per badxi' Béd con Waj laan, rëb reeman:

—Lëjt gajc gol been xgab: ¿Zagdxë naj yazooban xtiidxidi luar yazooban xtiidx Dios ya?

20 Per ad zajct yacwëëz yaguie'chan gra ni baguiaan baguiejn tëën.

21 Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nudëed reeman laa reeman casti, din graczi ree bejn ruza't Dios zagdxë por ni goc.

22 Nadëd tiuu ijz yu' bën bayajc guin.

Rbejdx ree bën rliladx Jesús Dios

23 Chi baslaa ree guxtis guin Béd con Waj, baguiaj reeman lod riga' xcompniar reeman bën rliladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee.

24 Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bën been xanyabaa në guidxliuj nëtëe nijsdoo con gra ni yu' loj reen.

25 Por xSprijt tëël gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

26 Bado'p ree rey në gra ree guxtis

din su reeman contr dux Dad ree Dios në contr Cristo.

27 'Abi' zian ma gojc, Herodes con Poncio Pilato con ree b́en Israel n̄t̄ēē ree b́en ad najt b́en Israel, badxajg lasa' reeman luguiedx guie persi guzuj reeman contr xi'nl Jesús, b́en naya nali, b́en ba-caabeel.

28 Zian gojc, been reeman zi'c ma beenl xgab diizd gocli.

29 Abi' yan Dad, baguiaa yan ruchejb reeman dunujn. Gogn̄e dunujn nayajcan xbejn̄l din gac yatie'chan xtiidxil sin guialrdxeb,

30 n̄e con xguialrniabeel yasiajcan b́enragxuu ree, yaguieen t̄ēē milagr ree por xguialrniabee xi'nl Jesús, b́en naya nali.

31 Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin guialrdxeb.

Ragn̄e lasa' ree b́en rliladx Jesús

32 Graczi ree b́en rliladx Jesucrist bidxajg gubajn reeman, r̄uj̄n reeman tijbzi xgab, ni'qui tijb reeman ad r̄ēbt̄ guial xieenzi reeman naj ni rajp reeman, din najn par gra reeman.

33 Gogn̄e Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman.

34 Ni'czi tijb reeman ad biaadxt xhienin, din graczi ree b́en rajp guidxliuj o b́en rajp yu ya ruto' reeman laan, abi' milia guin

35 rayü reeman loj ree apóstoles guin, persi laa reeman r̄gui's laan loj gra reeman zi'ctzi naj ni riaadx tijb gaj reeman.

³⁶ Loj reeman no'ch tijb b́en b́rii laj Xiéb, najman xdiaa b́en b́rii laj Leví, zéédaman yuj la Chipre ni riga' loj nijsdoo. Gunee ree apóstoles guin laaman Bernabé, rën guiëban B́en ragu' luxdoo ree bejn zagdxé.

³⁷ Gojpaman tijb guidxliuj, abi' bato'man laan persi badëëman milia guin loj ree apóstoles guin din qui's reeman laan.

5

Dol ni been ree Ananías con Safira

¹ Per guyu stijb b́en b́rii laj Ananías, xbéngunaaman b́rii laj Safira. Bato' tijb xguidxliuj reeman,

² per baya'nnë xbéngunaaman diidx persi baya'nnëman ta'n milia guin. Sta'n nan badëëman loj ree apóstoles guin, rëbaman laan naj gran.

³ Abi' rëb Béd lojman:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnël ta'n milia ni bato' xguidxliujl?

⁴ ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel bal-abladxil beenl zian? Loj Diosan nuyënl nusquieel, ad lojt bejnan.

⁵ Chi biguiejn Ananías ni rëbaman, biajbaman abi' güjtaman. Graczi ree b́en gogbee ni guzacaman dád bidxeb reeman.

⁶ Dxel bibig bëlzi ree xinguiag, batüüb reex laaman lajd persi biquie'ch reex laaman.

⁷ Chi gudëd cost choon hor, dxel bidxin xbéngunaa Ananías, ad ragbeetaman ni goc.

⁸ Dxel gunabdiidx Béd lojman rëbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nan.

⁹ Dxel rëb Bëd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

¹⁰ Loj hor zii gajc biajb Safira lod za' Bëd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë' lacheelaman.

¹¹ Graczi ree bën rliladx Jesucrist në gra ree bën gogbee ni goc, dád bidxeb reeman.

Zien ree milagr been ree apóstoles

¹² Zien ree milagr narooob been ree apóstoles guin loj ree bejn. Graczi ree bën rliladx Jesucrist radxajg lasa' ro' curdur lod rníee reeman xcurdur Salomón.

¹³ Zagdxë ruza't ree bën luguiedx guin laa reeman, per ad rayaxt reeman guchajg reeman laa reeman.

¹⁴ Abi' guixie guixie cayajcxhiey ree bën rliladx Dad Jesús, zi'c xinguaaw zi'c béngunaa.

¹⁵ Xt rbëë reeman bënragxuu ree lunejz, rguijxh reeman laa reeman loj ree loon në loj ree da, din chi téd Bëd, majsi xbalazaman téd guijc reeman.

¹⁶ Në ree bën zojb guiedx riga' ree gajxh Jerusalén, zien reeman bidxin Jerusalén, bidxinnë reeman bënragxuu ree në ree bën yu' xinxab luxdoo, abi' graczi reeman bayajc.

Gunaaz ree guxtis Bëd con Waj

17 Bixhioz mazri zojbloj rniabee graczi ree bixhioz në ree bénsaducew za'në laaman, guyu guialnadédloj luxdoo reeman,

18 abi' gunabee reeman biniaaz ree apóstoles guin persi badxe' reeman laa reeman ladxguiib.

19 Per guxhin zii tijb xi anjl Dios guxhal ro' ree xport ladxguiib guin, abi' babëëman laa reeman, rëbaman:

20 —Gol chej lën yadooro', gol biguiedx loj ree bejn xhie naag gap reeman guialnaban tiblayaa con Dios.

21 Chi biguiejn reeman ni rëb anjl guin, bareguiaal rsildoo wej reeman lën yadoo guin, guzuloj culüü reeman bejn ree xtiidx Dios.

Guiáad bixhioz zojbloj guin con ree bën za'në laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lën ladxguiib guin.

22 Per chi bidxin reex ro' ladxguiib guin, achutri ree apóstoles guin ree yu'. Dxel bicojn reex guxtis guin ree,

23 rëb reex:

—Chi badxinan, baguiaan nayaaw ro' ladxguiib guin zagdxe, laa ree suldad rajp ro' ladxguiib guin za', per chi baxhalan, achutczi yu' lënan.

24 Dxel bixhioz zojbloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rëb loj lasa' reeman, ¿ban xt guin chigdi-blagaa ree ni guie?

25 Loj hor zii gajc bidxin tijb xin rëb loj reeman:

—Laa ree bën badxe'di ladxguiib yu' lën yadoo culüü reeman bejn ree.

26 Dxel wej suldad rniabee guin con ree xsuldadix bica' reex apóstoles guin ree, per ad been-naat reex laa reeman guial rdxeb reex gucaaguiaj ree bejn laa reex.

27 Chi badxinnë reex laa reeman, bayü reex laa reeman loj guxtis. Dxel rëb bixhioz zojbloj guin loj reeman:

28 —¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bén Jerusalén ma gutie'chidi xtiidxix, nëtëë yan rëndi gudxiibidi du guijcan guial dunujn bagüjt laax.

29 Abi' badxi' Bëdan në gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj.

30 XDios dux béngulal ree basban Jesús, bén ba-caadi loj crüzj.

31 Abi' nüjn Dios laaman bén zojbloj, nabe'caman laaman xladbeeman, laaman naj bén rniabee rabëë tëëman bejn ree loj xtol reeman, abi' zian guxhalaman nejz par ree bén Israel din cwëëladx xtol reeman yadxi' tëë loj reeman loj Dios din güünman laa reeman perdon.

32 Dunujn në xSprijt Dios bén rudëëman loj ree bén ruzoob xtiidxaman, rayagbeen guial gra ree ni guin naj diidxli.

33 Chi biguiejn ree guxtis guin ni rëb reeman, dád balen reeman abi' guyën reeman nugüjt reeman laa reeman.

34 Per loj ree guxtis guin no'ch tijb bénfarisew laman Gamaliel, najman mextr rulüü ley abi' graczi ree bejn rajp laaman respejt. Guzuliman

abi' gunabeeman barii ree apóstoles guin xchu tibrajt.

³⁵ Dxel rëbaman loj ree guxtis guin:

—Bén Israel, gol been xgab xhienin güünnëdi bën guin ree.

³⁶ Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bën binal laax, yagaj gulox gra ni beenx.

³⁷ Abi' tëë lën ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per chi bagüjt ree bejn laax, gra ree bën binal laax bire'ch.

³⁸ Zeel rnin lojdi, ad bal chu'ridi con ree bën guin, gol baslaa reeman. Din bal bénguidxliuj rni-abee ni rüjn reeman, zadxin dxej loxan.

³⁹ Per bal por Dios cayüjn reeman ni guin ree, ad zajct gutëedi loj ni cayüjn reeman. Gol gojp cudad ad niad chi gagbeedi contr Diosan za'di.

⁴⁰ Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad guitie'chri reeman xtiidx Jesús, dxel baslaa reeman laa reeman zia reeman.

⁴¹ Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús.

⁴² Abi' ad rucwëëzt rulüü reeman rníee tëë reeman xtiidx Jesús, gra dxejczí rulüü reeman lën yadooro' Jerusalén nëtëë lidx lidx ree bejn.

Bibee gajdx ree bén güün yudar

¹ Lën ree dxej zii chi canuu cayajcxhiey ree bén rliladx Jesús, guzuloj cabe'c ree bén rniee diidx grieg xguialquia ree bén rniee diidx hebreo, rëb reeman guial gra dxejczy chi rië's ni raw ree béngunaa bizëjb, ta'ndoon rtia' ree bén rniee diidx grieg guial loy ree bén rniee diidx hebreo.

² Dxel guidixibtio'p ree apóstoles guin bato'p reeman graczi ree bén rliladx Jesucrist, abi' rëb reeman:

—Ad zagdxet naj guial yacwëez yalüün xtiidx Dios par yadi'san ni gaw ree bejn.

³ Zeel yanan lëjt compniar raliduladx ree Jesucrist, gol gudiil entr lojdi gajdx ree bén ragbeedi naban zi'c rayal, bén yu' xSprijt Dios luxdoo, bén yu' tëe ree xquiarguejn, din yazuj reeman güün reeman dxiin guin.

⁴ Guiáad dunujn yasnuu yarejdx yanaaban Dios, yalüü tëen xtiidxaman.

⁵ Graczi reeman cwëjb ni rëb reeman, abi' gulej reeman bén la Esteban, laaman rliladx Jesucrist guidib luxdooan, rniabee tëe xSprijt Dios luxdooan guidiblagaa. Gulej tëe reeman Felip, Prócoro, Nicanor, Timón, Parmenas në Nicolás bén zëed Antioquía, nëman bililadx ni rliladx ree bén Israel chi gadaman chililadx Jesucrist.

⁶ Dxel binë reeman laa reeman loy ree apóstoles guin, persi gurejdx gunab reeman Dios por laa reeman badxiib tëe yaa reeman guiyc reeman.

⁷ Canuu care'ch xtiidx Dios, abi' Jerusalén caya-jcxhiey ree bén rliladx Jesucrist, në zien ree bixhioz Israel bililadx laaman.

Biniaaz Esteban

⁸ Dád gognë Dios Esteban badëë tääman guialrniabee persi rüjnman zien loj milagr delant loj ree bejn.

⁹ Abi' bëlzi ree bén yadoo ni la Libertados në ree bén Cirene con ree bén Alejandría con ree bén niz Cilicia nëtëë ree bén zëed niz Asia, guzuloj cadildiidxnë reeman Esteban,

¹⁰ per ad gojct nadxi' reeman xtiidxaman guial cayagnë xSprijt Dios laaman.

¹¹ Dxel gudijx reeman bëlzi ree bejn din guiëb reeman, bacaagdiajg reeman rniee Esteban contr Dios në contr Moisejs.

¹² Zian been reeman persi bidxe'ch ree bén luguiedx guin, në ree bengol në ree mextr rulüü ley. Dxel gunaaz reeman Esteban, binë reeman laaman loj guxtis.

¹³ Gudiil tää reeman bén basquiee ree persi rëb reeman loj ree guxtis guin:

—Ad rucwëëzt rnieeguijdx xin guie xley Moisejs në xyadoo Dios.

¹⁴ Dunujn ma bacaagdiajg rëbix guial Jesús xin Nazaret guse'nx dux yadooro' ree, guchaa tääx costumbr basa'n Moisejs du loj ree.

¹⁵ Abi' guxtis guin ree në gra ree bén riga' yagaj, chi baguiaa reeman loj Esteban, baguiaa reeman najn zi'c tijb loj anjl.

7

Ni rëb Esteban loj ree guxtis

¹ Dxel bixhioz mazri zojbloj rniabee graczi ree bixhioz, gunabdiidxaman loj Esteban, rëbaman:

—¿Walin ya rëbil zian?

² Badxi' Esteban laan, rëbaman:

—Dad guxtis, në lëjt compniar, gol bacaagdi-ajg ni ganin. Dios bën yu' xanyabaa balüüloj loj dux béngulal ree Abraham, chi gureman niz Mesopotamia chi gadaman chisob guiedx Harán.

³ Abi' rëb Dios lojman: “Basa'n ladxil në gra ree lasa'l, wej loj yuj ni gulün lüj.”

⁴ Dxel brii Abraham ladx ree bën Caldea bisobaman Harán. Chi güt xDadaman, dxel bidnë Dios Abraham loj guidxliuj guie lod nadxu' ree yan.

⁵ Per chi bi't Abraham guie, achetczi guidxliuj badëöd Dios lojman, ni'czi tibda'nän ad badëötaman. Per beenman promejs loj Abraham guial gudëöman guidxliuj guie lojman, dxel chi guiëtaman tia' ree xdiaaman laan, majsi chi rëb Dios zian, ad wayut xi'n Abraham.

⁶ Rëb tëë Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëë reeman laa reeman loj tajp gayuu ijz.

⁷ Per rëb tëë Dios lojman: “Gudëdan gra ree bën gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.”

⁸ Chi guneenë Dios Abraham, baya'n reeman diidx guial rayal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidxip-tio'p ree xi'nman, bën goc ree dux béngulal ree.

⁹ Bën goc ree dux béngulal ree gudëdloj reeman Xiëb bën naj bijch reeman, abi' bato' reeman laaman loj ree bën zë Egipto, per ad guro'nladxt Dios laaman,

10 gognëman laaman loj ni guzagdiajman badëë tëëman xquiarguejnman, gognë tëëman laaman persi biajb rey guin laaman zagdxe, abi' beenman laaman gobernador Egipto, bazuj tëëman laaman din nabeeman gra ni rajp rey guin.

11 'Chi guyu gubijn guidibczi Egipto në niz Canaán, dxel guzagdiaj da't ree dux béngulal ree guial achet ni gaw reeman.

12 Per chi gogbee Jacob guial yu' trigo Egipto, guxhaal ree xi'nman bén naj dux béngulal ree, dxel wej reeman Egipto.

13 Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëëdaman.

14 Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn.

15 Zianan zeel bisob Jacob Egipto, ni gütaman ni gajc güt ree xi'nman, dux béngulal ree.

16 Gojc xchej dxel bignë reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

17 'Chi ma zidyob tiamp gac ni rëb Dios loj Abraham, zien ree bén Israel ma gojcxhiey Egipto.

18 Abi' guzuloj gunabee rey ren Egipto, bén ad beenbeet Xiëb.

19 Rey zii basagzi bén du ladx ree, gunabeeman chigsëëb reeman xindo niguiaaw golnejz ree din guiët reex.

20 Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw.

21 Chi bidxin dxej bigsa'n reeman laax lod bigsëëb reeman laax, xi'n gajc rey guin baca' laax,

persi baslaaman laax zi'c xi'nman.

²² Basiid Moisejs gra ni rajc ree b́en Egipto, abi' lasajc ni guneex ni been tēēx.

²³ 'Chi guyu Moisejs tiuu ijz, bidyajb guijcaman bignaj lasa' b́en Israelaman.

²⁴ Abi' chi baguiaaman caguin tijb b́en Egipto tijb b́en Israel, balajman laaman, bagüjtaman b́en Egipto guin.

²⁵ Naladx Moisejs niagbee ree b́en Israel guial por laaman yabēē Dios laa reeman loj ree b́en Egipto, per ad gogbeet reeman.

²⁶ Chi bareguiaal, bidxaagloj Moisejs tio'p ree b́en Israel caga'p reeman, abi' guyēnman nabe'cdxeman laa reeman, rēbaman: “¿Chexc zeel rdilidi? Awa b́en Israel naj gropidi.”

²⁷ Abi' b́en caguin b́en zatijb guin bacadxaaman Moisejs, rēbaman: “¿Chu bazuj lüj din nabeel dunujn, din na tēēl ni rayal yaguieenan?”

²⁸ ¿Wen rēnl ya gugüjtil naj zi'c bagüjtil b́en Egipto ni nieey?”

²⁹ Chi biguiejn Moisejs ni rēb b́en guin, baxüünman wejman niz Madián. Ni gureman zi'c benzit, abi' cwa'man b́engunaa, zianz guyu tio'p ree xi'ngaanman.

³⁰ 'Chi gudēd tiuu ijz, dxel balüüloj tijb xi anjl Dios loj Moisejs loj xbajl tijb yag ni cayazbajl lod naj yujbidx, gajxh guia' la Sinaí.

³¹ Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxe, biguiejnman cha' Dios rēbaman lojman:

³² “Naj naj xDios xbéngulal reel, Abraham, Isaac

në Jacob.” Dxel guzuloj canij Moisejs guial bidxebaman, ad bayaxtaman nuguaaman bajl guin.

³³ Dxel rëb Dios lojman: “Gulëë xgurëchil, din nagle' lod za'l.

³⁴ Naj cugua xhienaag cazagdiaj ree da bejnan Egipto, riguejnan roon reeman zeel biguia'tan din yabën laa reeman. Yan, guda din gaxhalan lüj Egipto.”

³⁵ 'Abi' majsi ad guyënt ree bën Israel nuzoob reeman xtiidx Moisejs yaloj, rëb reeman lojman: “¿Chu bazuj lüj din nabeel dunujn na tëël ni yaguieenan?” Per por anjl balüüloj loj bajl guin, badëëd Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c.

³⁶ Moisejs guin naj bën babëë dux búngulal ree Egipto, been tëëman milagr ree niz Egipto, në niz ro' nijsdoo ni la Nijs Xnia, në loj yujbidx lod guzu reeman tiuu ijz.

³⁷ Laagajc tëëman rëb loj ree bën Israel: “Loj gajquidi cwe Dios tijb bën gudëëd xtiidxaman loj ree bejn zi'c guleman naj. Gol bazoob xtiidxaman.”

³⁸ Dxel chi guzunë Moisejs dux búngulal ree niz loj yujbidx, laaman naj bën guneenë xi anjl Dios ruguia' la Sinaí, persi badëëman xtiidx Dios loj reeman, abi' diidx guin ree naj ni basa'n reeman duloj ree yan.

³⁹ 'Per dux búngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijczy reeman nayejc reeman Egipto.

⁴⁰ Dxel rëb reeman loj Aarón: “Been dios ree, din ned reeman du loj ree, din ad rayagbeet ree gonczi Moisejs bën babëë dunuj ree Egipto.”

⁴¹ Dxel been reeman tijb go'ndobëz din gaquib xdios reeman. Bagüjt reeman be ree persi badëed reeman laa reeb zi'c gon loj ni been reeman, been reeman lanij guial babaanë reeman ni been gajc reeman.

⁴² Dxel guro'nladx Dios laa reeman, baslaaman guyën reeman gubijdx con bëëw con bajl yu' ree xanyabaa. Din zian ca loj xtiidx Dios ni bacaa ree bën badëed xtiidxaman loj ree bejn, lod rëb: Bën Israel, loj tiuu ijz ni guzudi loj yujbidx, ¿wen bagüjtidi be ree ya din guneedi laa reeb lon zi'c gon?

⁴³ Per mazri guyëndi xdxandi Moloc biala tëedi lidxan, në xbajl dxan Refán, dxan been gajquidi din guzuxibidi loj reen.

Zeel gaxhalan lëjt mazri zijt guial Babilonia.

⁴⁴ 'Abi' chi guzu ree dux béngulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rëbaman lojman guial güünman laan zi'c ma baguiaaman.

⁴⁵ Chi güt Moisejs, baya'nnë ree dux béngulal ree yadoo guin. Chi baya'n Josué xluar Moisejs, dxel bidnë reeman yadoo guin chi gudil reeman guijc guidxliuj con ree bën ren, abi' gognë Dios laa reeman persi been reeman gan baya'nnë reeman guidxliuj guin ree. Zian guzunë reeman yadoo guin xt bidxin dxej guzuloj gunabee rey Davi.

⁴⁶ Guyën Dios rey Davi, abi' laaman guyënman nünman tijb yadoo par Dios, bën naj dux Dios ree nayajc ree bën Israel.

⁴⁷ Per rey Salomón naj bën been laan,

⁴⁸ majsi Dios bën yu' xanyabaa ad rbejtaman lën yadoo ni rün ree bejn, zi'c rëb bën badëed xtiidx Dios loj ree bejn diizd gocli, chi rëbaman:

⁴⁹⁻⁵⁰ Xanyabaa naj lod zooban par ganabeen, guiáad loj guidxliuj naj lod ruzu guia'n.

¿Xhienaag gac yu güüdi par naj?

¿O xhienaag naj lod yaziiladxan?

¿Id naj ben graczi ree ni guie ya?, rëb Dios.

⁵¹ 'Per lëjt —rëb Esteban —dád nadidi, ad rëntidi guzoobidi xtiidx Dios, ad rën tëëtidi chignia'di, zianczi za'di contr xSprijt Dios, zi'cgajc been ree xbéngulalidi.

⁵² ¿Chu bën badëed xtiidx Dios loj ree bejn ad beennaat ree xbéngulalidi? Xt bagüjt reeman bën badëed ree xtiidx Dios bën rëb ree guial gui't tijb bën naya nali. Abi' yan ma bi'taman, bayüdi laaman loj ree bën rniabee, gunabee tëedi güjtaman.

⁵³ Majsi cwa'di xley Dios loj ree xi anjlaman, per ad rüjntidi zi'c rëb loj ley guin.

Bagüjt reeman Esteban

⁵⁴ Chi biguiejn reeman ni rëb Esteban, xt raw lay reeman tant balen reeman laaman.

⁵⁵ Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tëëman Jesús za'man xladbee Dios.

⁵⁶ Dxel rëb Esteban:

—¡Gol baguiaa! Ruguian naxal xanyabaa, ruguia tēen Bén guxhaal Dios za'man xladbee Dios.

⁵⁷ Per chi biguiejn reeman zian, bata'cw guidi-ajg reeman, dxel gurixdiaj reeman zignaaz reeman Esteban,

⁵⁸ babēē reeman laaman loj ciuda guin, bicüjt reeman laaman con guiaj, guiáad xab reeman basa'nsii reeman loj xinguiag la Saulo persi canaxan.

⁵⁹ La'tgaj cucaaguaiaj reeman Esteban, rēbaman:
—Dad Jesús, baca' da sprijtan.

⁶⁰ Dxel bazuxibaman guridxa'man rejs, rēbaman:

—Dad Jesús, ad güüncwentil dol cayüjn ree bén guin yan.

Naabczi gulox rēbaman zian, laa güt gajcaman.

8

Guzunal Saulo bén rliladx ree Jesucrist

¹ Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman Bén Jerusalén ree Bén rliladx ree Jesucrist, dxel bire'ch reeman guidib niz Judea nē niz Samaria, Bén najzi ree apóstoles baya'n.

² Guyu bēlzi ree xinza'c, laa reex biquie'ch Esteban, abi' dád biin reex guijcaman.

³ Guiáad Saulo rzunalaman Bén rliladx ree Jesucrist, ruman yu yu din cwēē naguiejnman laa reeman, zi'c xinguiaw zi'c béngunaa, persi rgu'man laa reeman ladxguib.

Bacaagdiajg ree Bén Samaria xtiidx Dios

4 Per b́en b́rii ree Jerusalén, lod zétzi reeman rtie'ch reeman xtiidx Dios.

5 Zi'c been Felip, wejman guiedx Samaria, guzuloj caneeman xtiidx Jesucrist loj ree bejn.

6 Dád zien ree bejn rdo'p, graczi reeman rucaagdiajg chaaw ni rēb Felip, ruguiaa tēē reeman milagr ree ni rüjnman.

7 Zien ree b́en nējt tib lajt xcuerp bayüjn Felip, nē ree b́en ad rzat zagdx, bayüjn tēēman b́en yu' ree xinxab luxdoo abi' rbixdiaj reex rarii reex.

8 Zianan zeel babaa da't ree b́en luguiedx zii.

9 Per luguiedx zii guyu tijb b́en b́rii laj Simón, diizd gocli rüjnman guialbidxaa persi rusquieeman b́en Samaria ree, rüjnman b́en lasajc.

10 Graczi reeman rucaagdiajg chaaw ni rēbaman, diizd mazri ree xinguiag xt mazri ree bengol, abi' rēb reeman:

—Naroob naj xguialrniabee Dios ni rajp b́en guie.

11 Bidxga' reeman laaman guial ma gojc xchej cusquieeman laa reeman con guialbidxaa ni rüjnman.

12 Per chi bililadx reeman ni rēb Felip xcwent xguialrniabee Dios nē xcwent Jesucrist, zi'c ree xinguaaw zi'c ree b́engunaa gurobnijs reeman.

13 Xt nē Simón bililadx gurobnijs tēēman, abi' ad riro'nladxtaman Felip radxa tēē lojman graloj ree milagr ruguiaaman rüjn Felip.

14 Chi gogbee ree apóstoles riga' Jerusalén guial ma bililadx ree b́en Samaria xtiidx Dios, dxel guxhaal reeman Béd con Waj ni.

15 Chi bidxin reeman, gurejdx gunab reeman Dios por ree b́en Samaria b́en ma rliładx ree xtiidx Dios din chu' xSprijt Dios luxdoo reeman,

16 din ni'qui tijb reeman ad wayut Sprijt guin luxdoo, gurobnijsi reeman por Dad Jesús.

17 Dxel guxhoob yaa ree Béd con Waj guijc reeman, abi' guyu xSprijt Dios luxdoo reeman.

18 Chi baguiaa Simón cayu xSprijt Dios luxdoo ree b́en guin guial caxhoob yaa ree apóstoles guin guijc reeman, dxel guyenman nudëeman milia loj reeman,

19 rëbaman:

—Në lon gol banee guialrniabee guin din chi gaxhob yan chutëez guijc b́enan, në luxdoo man chu' xSprijt Dios.

20 Dxel badxi' Béd xtiidxaman rëbaman:

—Nitol con guidib xmilial, din rüjnl xgab guial zajc siil guialrniabee razaladx Dios.

21 Ad rayalt ad zajc tëet güjnl zi'c raguieenan, din ni'quid zinaltil xnejz Dios.

22 Bayüjn xgab por ni mal beenl, gurejdx gunab tëe Dios, rupent güjman lüj perdon por ree xix-gabmalil,

23 din ragbeen ganax guialralen yu' luxdool, abi' dol guin naj ni rniabee lüj.

24 Dxel badxi' Simón xtiidxaman, rëbaman:

—Gol gurejdx gunab Dios por naj, chitëe gaza'can ni'qui tijb ni ma nadi.

25 Chi gulox gunee ree apóstoles guin xtiidx Dios loj ree b́en guin, dxel badxin reeman Jerusalén, abi' graczi ree guiedx riga' niz Samaria lod gudëd reeman gutie'ch reeman xtiidxza'c Jesucrist.

Felip con b́en Etiopía

²⁶ Chi ma gudöd gojc zian, gunee tijb xi anjl Dios Felip rëbaman:

—Wej niz sur nejz ni zë Jerusalén xt lod la Gaza, niz lod naj ganax yujbidx.

²⁷ Dxel brii Felip zëman. Runejz guin banaazaman tijb bën Etiopía, najman bën zojbloj guial laaman rgu'chaaw xmilia Candace, bën naj reina Etiopía. Wejman Jerusalén bignajchi'man Dios,

²⁸ abi' ma bayunejaman zia ladxaman, zojb lën xcarrejt zagdxeman, roolaman loj gui'ch ni bacaa Isaías, bën badëöd xtiidx Dios loj ree bejn.

²⁹ Dxel rëb xSprijt Dios loj Felip:

—Bibig gajxh cwë' carrejt guin.

³⁰ Chi bibigaman, biguiejnman cayool bën guin loj gui'ch bacaa Isaías. Dxel gunabdiidxaman lojman rëbaman:

—Dad, ¿rignia'l ni cayoolil ya?

³¹ Badxi' bën guinan rëbaman:

—¿Xoza chignia'nán? Awa achut gusignia' naj.

Dxel rëbaman loj Felip din chë'paman loj carrejt guin, cweman cwë'man.

³² Loj xtiidx Dios lod cayool bën guin rëban:

Zi'c rinë reeman tijb xiil,

binë reeman laaman lod gugüjt reeman laaman.

Abi' achet rëbaman,

zi'c tijb xiil ma za' loj ree bën gugaj guidxladib.

³³ Chi beennë reeman laaman zi'ctzi rën reeman, achut been guialguxtis por laaman.

Yan achut guza't xdiaaman,

din ma bisüd reeman laaman loj guidxliuj.

³⁴ Rëb bën guin loj Felip:

—Guna sii, ¿chu xcwent rníee bén bacaa diidx guie ree? ¿Xcwent gajcaman ya o xcwent ben renan?

³⁵ Dxel guzuloj Felip cusignia'man laaman xtiidx Dios ni cayoolaman, zian beman xtiidxza'c Jesucrist lojman.

³⁶ Abi' chi gudéd reeman lod yu' nijs, dxel rëb bén guin loj Felip:

—Guie yu' nijs. ¿Nid zajc garobnijsan guie ya?

³⁷ Zeel rëb Felip lojman:

—Bal rliladxil guidib luxdool, zajcan.

Badxi' bén guinan rëbaman:

—Rliladxan guial Jesucrist naj Xi'n Dios.

³⁸ Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman.

³⁹ Chi barii reeman lojnijs guin, loj hor zii gajc gunidloj Felip binë xSprijt Dios laaman, abi' ad baguiaatri bén guin laaman, per dád rabaaman zinal xnejzaman.

⁴⁰ Chi gogbee Felip, ma za'man xt guiedx Azoto, dxel zëman guiedx guiedx zigtie'chaman xtiidxza'c Jesucrist xt bidxinman Cesarea.

9

Bililadx Saulo Dad Jesucrist

(Hch. 22:6-16; 26:12-18)

¹ Guiáad Saulo ad rucwëézt rdxe'chaman bén rliladx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zojbloj rniabee graczi ree bixhioz,

² din gac tijb gui'ch din gac cheman lën ree yadoo Damasco chigdiilaman bën rliladx ree Jesucrist, zi'c ree xinguaaw zi'c ree béngunaa, din chignëman laa reeman ladxguiib Jerusalén.

³ Per chi ma cadxinman gajxh guiedx Damasco, dxejlczi brii tijb gui j xanyabaa balaan bacha' lod zëman.

⁴ Abi' bireeyujman, chi naga'man luyuj guin bigueijnman cha' bën rëb:

—Saulo, Saulo, ¿chexc zeel rzunalil naj?

⁵ Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguuil xguialnaal zi'c rüjn tijb go'n rudxeguaia' loj yag ni rulaagnë reeman laab.

⁶ Rnij Saulo guial tant bidxebaman, abi' rëbaman:

—Dad, ¿xhie rënl günan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

⁷ Abi' ree bën në Saulo dád bidxeb reeman guial bigueijn reeman cha' bejn, per achutczi baguiaa reeman.

⁸ Chi bixcheman luyuj guin, baxhal lojman, ad rajctri ruguiaaman. Dxel gunaaz reeman yaaman bignë reeman laaman Damasco.

⁹ Ni guzuman choon dxej, ad rajct ruguiaaman, achetczi rawaman ache tëëtczi rë'man.

¹⁰ Damasco gure tijb bën rliladx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

¹¹ Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëed Tarso, lax Saulo. Din laax cabejdx canab naj,

¹² abi' zi'c rulüü cane'xhchaalix, baguiaax guyu tijb bén la Ananías guxhoob yaaman guijquix persi baguiaax stijb.

¹³ Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bén rliladx ree lüj Jerusalén.

¹⁴ Yan zëedix guie con xguialrniabee ree bixhioz rniabee ree bixhioz, din guiniaazix gra ree bén rliladx lüj.

¹⁵ Dxel rëb Jesucrist lojman:

—Wej, din naj gule laax din chiguiex da diidxan loj ree bén ad najt bén Israel, në loj ree rey, con nëgajc loj ree bén Israel.

¹⁶ Guiën lojx guial sagdiaj da'tix guial najx da bejnan.

¹⁷ Dxel zë Ananías lënü lod za' Saulo. Chi guyuman, guxhoob yaaman guijcaman, rëbaman:

—Bijch Saulo, Dad Jesús bén balüüloj lojl runejz lod zëedil, laaman guxhaal naj din yaguaaal, chu' tää xSprijt Dios luxdool.

¹⁸ Loj hor gajc zi'c rulüü yu' xhie biquied guiaalojman abi' baguiaaman stijb. Dxel guzuliman gurobnij saman,

¹⁹ gudaw tääman persi bayuman gojl. Dxel guzuman Damasco tio'p choon dxej con ree bén rliladx Jesucrist.

Gunee Saulo xtiidx Dios Damasco

²⁰ Dxel guzuloj gunee Saulo xtiidx Dios lën ree yadoo, rëbaman guial Jesucrist naj Xi'n Dios.

²¹ Graczi ree bën biguien ni rëbaman badxa loj reeman abi' rëb reeman:

—¿Nid bën guien rzunal bën rliladx ree Jesucrist Jerusalén ya? ¿Nid laagajcaman zëed guie ya, din guiniaazaman bën rliladx ree Jesucrist chignë tëëman laa reeman loj ree bixhioz rniabee ree bixhioz?

²² Per Saulo guixie guixie mazri cariiman guial-rdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree bën Israel zojb ree Damasco chi rucaagdiajg reeman ni rëbaman.

Baxüün Saulo guiedx Damasco

²³ Ad xchejt gojc, baya'n ree bën Israel diidx din nugüjt reeman Saulo,

²⁴ per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman.

²⁵ Per ree bën rliladx Jesucrist, guxhin badxe' reeman laaman lën dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

Badxin Saulo Jerusalén

²⁶ Chi badxin Saulo Jerusalén, guyënman nuchagaman bën rliladx ree Jesucrist, per graczi reeman bidxeb laaman guial ad rliladxt reeman nëman ma rliladx Jesucrist.

²⁷ Dxel binë Bernabé laaman loj ree apóstoles guin, bagojnman guial baguiaa Saulo dux Dad ree

Jesucrist, guneenë tēēman laaman chi zēman Damasco, bagojn tēēman guial Damasco gunee Saulo xtiidx Jesucrist sin guialrdxeb.

²⁸ Zian baya'n Saulo Jerusalén abi' nayuman laa reeman.

²⁹ Ad rdxebtaman ruza'taman Dad Jesús, abi' xt gudijldiidxnēman bēn Israel rnīee ree diidx grieg, per guyēn reeman nugūjt reeman laaman.

³⁰ Chi gogbee ree bēn rliladx Jesucrist zian, binē reeman laaman guiedx Cesarea. Yagaj baxhaal reeman laaman guiedx Tarso.

³¹ Dxel babedxe luxdoo ree bēn rliladx Jesucrist, bēn zojb ree niz Judea nē niz Galilea nētēē niz Samaria, chigagaj beenbee reeman mazri xhien-aag naj xnejz Dios, bazoob tēē reeman xtiidxaman, abi' cayagnē xSprijt Dios cayajcxhieje reeman.

Bayajc Eneas

³² Chi biza Bēd bitixlojman bēn rliladx ree Jesucrist, dxel wej gajcaman bitixlojman bēn rliladx ree Jesucrist guiedx Lida.

³³ Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajct rzax.

³⁴ Abi' rēb Bēd lojx:

—Eneas, ma bayūjn Jesucrist lūj. Bixche, bales ni go'til loj.

Loj hor zii gajc bixchex.

³⁵ Chi baguiaa gra ree bēn zojb guiedx Lida nē ree bēn zojb niz Sarón guial ma bayajc Eneas, dxel nē reeman bililadx Jesucrist.

Baban Dorcas

³⁶ Loj tiamp zii guyu tijb béngunaa rliladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tēeman yudar bēnprob ree.

³⁷ Lēn ree dxej zii gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lēnü ladya.

³⁸ Abi' gajxh guiedx Jope raya'n guiedx Lida lod za' Bēd. Chi gogbee ree bēn rliladx Jesucrist guial za'man ni, guxhaal reeman tio'p ree xinguaaw bisajc reex Bēd liaadx, rēb reex:

—Been wen yo' ree Jope yan gajczi.

³⁹ Laa zinē gajcaman laa reex. Chi bidxinman, binē reeman laaman lēnü lod naga' xcuerp Dorcas. Ni riga' zien ree béngunaa bizējb roon reeman, abi' bibig reeman loj Bēd culüü reeman gra lajd ni been Dorcas chi sta nabanman.

⁴⁰ Dxel gunabee Bēd barii gra reeman, abi' bazuxibaman gurejdx gunabaman Dios. Dxel baguiaaman bengüt guin, rēbaman:

—¡Tabita, bixche!

Laa guxhal gajc lojman. Chi baguiaaman Bēd, gureliman,

⁴¹ dxel gunaaz Bēd yaaman persi guzuliman. Abi' gurejdxaman bēn rliladx ree Jesucrist con ree bēn bizējb guin, persi baguiaa reeman guial ma baban Dorcas.

⁴² Guidibczi guiedx Jope gogbee reeman ni goc, abi' zien da't reeman bililadx Jesucrist por zian.

⁴³ Guiáad Bēd baya'nman mazri dxej luguiedx guin, lidx Simón bēn rüjnchaaw guid.

10

Wej Béd lidx Cornel

¹ Luguiedx Cesarea gurej tijb b́en brii laj Cornel. Laaman goc suldad gunabee tibcwaa ree suldad brii laj Italiano.

² Gojcaman benza'c, laaman nē gra ree b́en zojb lidxaman guyēn reeman Dios, abi' d́ad beenman yudar b́en Israel ree, b́en naj ree b́enprob, nē zianczi rbejdx rniabaman Dios.

³ Tijb dxej cost raca choon wadxē, guzajcaman zi'c rulūū cane'xhchaalaman. Zagdxeczi baguiaaman guyu tijb xi anjl Dios lēnū lod za'man, abi' rēb anjl guin lojman:

—¡Cornel!

⁴ Baguiaaman loj anjl guin, abi' d́ad bidxebaman, rēbaman:

—¿Xhienin, Dad?

Abi' rēb anjl guin:

—Ma biguiejn Dios xtiidxil ma baguiaa tēēman xhienaag rūjnl yudar b́enprob ree.

⁵ Guxhaal ree b́en che luguiedx Jope din chica' reeman Simón, b́en la gajc Béd.

⁶ Zojbaman lidx tijb b́en la gajc Simón, b́en rūjnchaaw guid, b́en zojb gajxh ro' nijsdoo. Béd guin na ni rayal gūūnl.

⁷ Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians rililadx tēēman Dios.

⁸ Gulox beman diidx loj reeman ni guzacaman, dxel guxhaalaman laa reeman Jope.

9 Chi bareguiaal, la'tgaj cadxin reeman gajxh Jope, cost garol dxej wë'p Bëd guiyc yu lod zojbaman din cwedx guiniabaman Dios.

10 Dád gulaanman, guyënman niajwaman, per la'tgaj cayüjn reeman ni gawaman guzajcaman zi'c rulüü cane'xhchaalaman.

11 Baguiaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan.

12 Loj lajd guin yu' gra loj ree be yu' tajp guia', në ree bëël, nëtëë ree be rzuj.

13 Dxel biguiejnman cha' bën rëb:

—Bëd, bisu, bagüjt be gawil.

14 Per badxi' Bëd laan rëbaman:

—Yajqui, Dad. Ad wayawtczan nidxuudx ni ad rayalt gaw bejn.

15 Abi' rëb cha' bën guin zatijb:

—Ni ma basia Dios ad rnieelan nidxuudx.

16 Choon volt gojc zian, dxel bayë'p lajd guin xanyabaa stijb.

17 La'tgaj cayüjn Bëd xgab xhie rën guiëb ni baguiaaman, loj hor zii gajc bidxin ree bën guxhaal Cornel rulidx Simón, guial ma gunabdiidx reeman banguin naj lidxaman.

18 Chi bidxin reeman, gunabdiidx reeman bal ni zojb Simón bën la gajc Bëd.

19 Guiáad Bëd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguaaw raguuil lüj.

20 Bisu, biguiajt binë reex, ad chu' luxdool tio'p, din naj guxhal laa reex.

21 Dxel baguiajt Bëd lod za' ree bën guxhaal Cornel, abi' rëbaman loj reeman:

—Naj naj b́en raguillidi, ¿chexquiza zeel raguillidi naj?

²² Dxel badxi' reeman laan rēb reeman:

—Guxhaal b́en la Cornel dunujn, b́en rniabee tibcwaa ree suldad, najman benza'c, rdxebaman Dios, abi' graczi ree b́en Israel rēn laaman. Tijb xi anjl Dios rēb lojman, guial rayal guixhiaalaman dunujn yudca'n lūj din yo' ree lidxaman, din gu-caagdiajgaman ni rayal guiēbil.

²³ Dxel badxe' Bēd laa reeman lēnū, ni gudēd reeman guiaal. Chi bareguiaal, binēman laa reeman. Nē bēlzi ree b́en zobj Jope b́en riladx ree Jesucrist binē laaman.

²⁴ Chi bareguiaal bidxin reeman Cesarea lod zobj Cornel. Abi' bato'p Cornel gra ree lasa'man nē ree xmiwaman, din cwēz reeman guidxin reeman.

²⁵ Chi bidxin Bēd lidx Cornel, laa brii gajc Cornel bigchaaglojman laaman, dxel bazuxibaman loj Bēd persi gojpaman laaman respejt.

²⁶ Per bazuli Bēd laaman, rēbaman:

—Guzuli, din lasa' bejn gajcan lūj.

²⁷ La'tgaj cadxin reeman ruyu guin cayū reeman diidx. Abi' chi guyu reeman, baguiaa Bēd zien da't ree bejn riga' ni.

²⁸ Dxel rēb Bēd loj reeman:

—Ma qui ragbeedi xhienaag naj xley ree b́en Israel, guial ad zajct go'ch reeman loj ree b́en ad najt b́en Israel o chu' reeman lidx reeman. Per ma balūū Dios naj guial achutczí rayal ganen bendxuudx, b́en nabixhladx.

²⁹ Zeel chi bidca' reeman naj, laa bial gajcan achet guijc badxiban. Yan rēnan gagbeen, ¿chexquiza zeel gurejdxidi naj?

³⁰ Badxi' Cornelan rēbaman:

—Ma gojc tajp dxej cost hor guie gajc, chi zoob lidxan, raca choon wadxē, cabedx canaaban Dios, loj hor zii balüüloj tijb bejn lon najcwaman lajd nayni.

³¹ Abi' naman lon: “Cornel, ma biguiejn Dios xtiidxil, yu'guijc tēēman xhiēnaag rüjn l yudar bēnprob ree.

³² Zeel guxhaal ree xin che luguiedx la Jope din chica' reex Simón, bēn la gajc Bēd. Zojbaman lidx tijb bēn la gajc Simón, bēn rüjnchaaw guid, bēn zojb gajxh ro'nijsdoo. Bēd guin na ni rayal güünl.”

³³ Zianan zeel laa guxhal gajcan xin bidgadiil ree lüj. Zagdxē beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

Ni gunee Bēd lidx Cornel

³⁴ Dxel guzuloj canee Bēd, rēbaman:

—Ma ragbeen yan guial tiblojzi ruguiaa Dios bejn.

³⁵ Din Dios, chutēēz bēnguidxliuj ridxga' laaman rüjn tēēman zi'c rayal, nēgajc Dios ridxga' laaman.

³⁶ Dios ma gunee bēn Israel ree, ma bagojnman guial por Jesucrist raxedxē luxdoo bejn, bēn naj Dad par gra ree bēnguidxliuj.

³⁷ Lējt ragbee xhiēnaag baza't reeman Jesús diisd niz Galilea xt guidib niz Judea, chi gulox bagojn Waj bejn ree xcwent guialrirobnijs.

³⁸ Ragbee tēedi guial ma badēē Dios xSprijtaman con xguialrniabeeman loj Jesús bēn Nazaret, abi' bizaman biguieenman ni zagdxē, bayūjnman gra ree bēn cazagdiaj por xindxab. Gojc beenman zian guial za'nē Dios laaman.

³⁹ Abi' dunujn baguiaa gra ni been Jesús guidib niz Judea, nē niz Jerusalén. Dxelri bagūjt reeman laaman, bacaa reeman laaman loj crūjz.

⁴⁰ Per Dios basban laaman ni bayon dxej, abi' cwējb Dios bidgalūūlojman du lojn.

⁴¹ Ad balūūlojtaman loj gra ree bejn, tijbzi du lojn nayajcan bēn gule Dios diizd yaloj din yaguaian graczi ni beenman. Abi' dunujn badaawnē' laaman badū'nē' tēēn laaman chi babanman stijb.

⁴² Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din gūnman guialguxtis chi guidxin dxej yadēēd gra ree bejn cwent loj Dios, zi'c ree bēn naban zi'c ree bēn ma gūjt.

⁴³ Nētēē diizd gocli graczi ree bēn badēēd xtiidx Dios loj ree bejn, gunee reeman xcwent Jesús, rēb reeman guial graczi ree bēn chililadx laaman, gac xtol reeman perdon.

Guyu xSprijt Dios luxdoo ree bēn ad najt bēn Israel

⁴⁴ Sta canee Bēd, chi guyu xSprijt Dios luxdoo gra ree bēn cucaagdiajg ni cayēbaman.

⁴⁵ Dxel bēn Israel rliladx ree Jesucrist, bēn binē ree Bēd, dād badxa loj reeman guial nē ree bēn ad najt ree bēn Israel guyu xSprijt Dios luxdoo,

⁴⁶ guial rigujejn reeman ma rnīee ree bēn guin graloj ree diidx, abi' ruza't reeman Dios zagdxē.

⁴⁷ Dxel rëb Bëd loj reeman:

—¿Chu zajc gudxoon tiobnijs ree bën guie, bal ma yu' xSprijt Dios luxdoo reeman zi'cgajc dunuj ree?

⁴⁸ Abi' gunabeeman tiobnijs reeman por Jesucrist. Dxelri guzajc reeman liaadx loj Bëd din sunëman laa reeman za tio'p choon dxej mazri.

11

Guyu xSprijt Dios luxdoo ree bën ad najt bën Israel

¹ Bën naj ree xi apóstoles Jesús con ree bën Judea, bën riladx ree laaman, gogbee reeman guial në ree bën ad najt bën Israel bililadx xtiidx Dios.

² Abi' chi badxin Bëd Jerusalén, bën Israel ma riladx ree Jesucrist, bën sta zinal ree ley, gudilë reeman Bëd.

³ Rëb reeman lojman:

—¿Chexc zeel bichu'l lidx ree bën ad najt bën Israel abi' gudawnël laa reeman?

⁴ Dxel guzuloj cayü Bëd diidx diizd guia'xchej xhienaag gojc zeel wejman lidx ree bën guin abi' rëbaman loj reeman:

⁵ —Chi za'n luguiedx Jope, la'tgaj cabedx canaanban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan caguiajtan diizd xanyabaa xt lod za'n.

⁶ Chi baguian zagdxe xhie yu' loj lajd guin, baguian bedoxh ree në ree be yu' tajp guia' në ree bëël con ree be rzuj.

⁷ Dxel biguejnan cha' bejn, naman: “Bëd, guzuli, bagüjt be gawil.”

8 Per badxi'nan rën: “Yajqui, Dad, din ad goctczi wayawan nidxuudx, ni ad rayalt gaw bejn.”

9 Abi' guneeman diizd xanyabaa stijb, naman: “Ni ma basia Dios, ad rnieelan nidxuudx.”

10 Choon volt gojc zian, dxel bayë'p gra ni guin xanyabaa.

11 Loj hor zii gajc bi't choon ree xinguaaaw lod guren, zëed reex diizd Cesarea, cayguil reex naj.

12 Abi' na xSprijt Dios lon guial chinë'n laa reex, ad chu' luxdon tio'p. Në guixo'p ree bën guie bën naj dux compniar ree binë'n. Abi' dugraczan badxu' lidx bën guin.

13 Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bën che luguiedx Jope din chica' reeman Simón, bën la gajc Bëd,

14 laaman na xhienaag gac ree xtolil perdon, con gra ree bën zojb lidxil.”

15 Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj.

16 Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.”

17 Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

18 Chi biguiejn ree bën guin ni rëb Bëd, dxel achetri rëb reeman lojman abi' baza't reeman Dios zagdxe, rëb reeman:

—¡Ma rayagbee ree yan guial në ree bën ad najt

bén Israel ma balüü Dios guial rayal yayüjn xgab por xtol reeman yadxi' tée loj reeman lojman din gap reeman guialnaban tiblayaa delant lojman!

Bililadx ree bén Antioquía Jesucrist

¹⁹ Chi mal bagüjt ree bejn Esteban, dxel guzu-loj rzunal reeman bén rliladx ree Jesucrist persi bire'ch gra ree bén rliladx guin niz Fenicia, niz Chipre në Antioquía. Abi' gutie'ch reeman xti-idxa'c Jesucrist, per ganaxzi loj ree bén Israel.

²⁰ Per loj reeman no'ch bëlzi ree bén Chipre në ree bén Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bén ad najt bén Israel.

²¹ Gognë Dios laa reeman, dád zien ree bejn bililadx ni rëb reeman abi' bililadx reeman Jesucrist.

²² Chi gogbee ree bén Jerusalén rliladx Jesucrist ni goc, guxhaal reeman Bernabé xt guiedx Antioquía.

²³ Chi bidxinman ni, dád babaaman chi baguiaaman xhienaag cayagnë Dios bén guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist.

²⁴ Benza'c gojc Bernabé, dád gognë xSprijt Dios laaman abi' bililadxaman Jesucrist con guidib luxdoo. Zeel dád zien ree bejn bililadx Jesucrist.

²⁵ Dxelri wej Bernabé guiedx Tarso bigdiilaman Saulo.

²⁶ Chi badxejlaman laaman, dxel binëman laaman xt Antioquía. Ni guzunë reeman bén rliladx

ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëelaj reeman bën rliladx ree Jesucrist, cristian.

²⁷ Lën ree dxej zii bëlzi ree bën badëë xtiidx Dios loj ree bejn, guza Jerusalén wej reeman Antioquía.

²⁸ Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio.

²⁹ Abi' ree bën rliladx Jesucrist luguiedx Antioquía, baya'n reeman diidx din guido'p reeman zi'ctzi ni galguzuj gudëed tijb gaj reeman, din gagnë lasa' reeman, bën rliladx ree Jesucrist, bën zojb ree niz Judea.

³⁰ Abi' zian been reeman. Dxel guxhaalnë reeman laan Saulo con Bernabé din gudëed reeman laan loj ree bën rniabee ree bën rliladx Jesucrist niz Judea.

12

Guyu Bëd ladxguiib

¹ Lën ree dxej zii guzuloj rey Herodes cusagziman bëlzi ree bën rliladx Jesucrist.

² Abi' gunabeeman bagüjt reeman Jacob bijch Waj, con espad.

³ Chi baguiaaman bayuladx ree bën Israel ni beenman, dxel gunabeeman gunaaz reeman Bëd. Ni ne goc lën ree dxej lanij pascw chi raw reeman guiadxtil ad yu't lewadur.

⁴ Chi gunaaz reeman Bëd, badxe' reeman laaman ladxguiib abi' gunabee rey Herodes tajp cwaa ree suldad din guinia reeman ro' ladxguiib

guin, tib cwaa gaj reeman naj tajp suldad. Din beenman xgab nuzujman Béd loj ree bén guiedx guin chi nidéd pascw.

⁵ Zian guyu Béd ladxguiib, gojp da't reeman laaman. Per gra ree bén rliladx Jesucrist ad rucwëëzt rbejdx rniab reeman Dios por laaman.

Babëë Dios Béd ladxguiib

⁶ Guxhin zii gajc chi yareguiaal cwëë Herodes Béd loj ree bén guiedx guin, naga'yëjs Béd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguiib guin.

⁷ Dxejczy bidxin tijb xi anjl Dios abi' basni tijb guij lën ladxguiib guin, dxel baqui' anjl guin cwë'lën Béd persi bacwëënman laaman, rëbaman lojman:

—¡Cari bixche!

Loj hor zii gajc biajb ree caden naxii yaa Béd,

⁸ abi' rëb anjl guin lojman:

—Guxhiidxi'ch lënl balëë tëë xgurëchil.

Chi ma been Béd zian dxel rëb anjl guin:

—¡Gojt xcajpil, tanal naj!

⁹ Laa barii gajc Béd nalaman anjl guin, per ad ragbeetaman bal diidxli naj ni cayüjn anjl guin, gunaladxaman cane'xhchaalzaman.

¹⁰ Abi' gudëd reeman loj tibcwaa ree suldad guin, dxel gudëd reeman loj stibcwaa reeman. Chi bidxin reeman ro' portguiib ni rarii runejz guin, dxel xtijbzan bixal abi' barii reeman. Abi' chi bidxin reeman tijb xquin, yagaj basa'n anjl guin Béd.

11 Dxel gogbee Béd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëëman naj loj Herodes, con loj gra ni nÿjnnë ree bën Israel naj.

12 Chi bayagbee Béd ni guzacaman, dxel baguijman lidx Li, xniaa Waj, bën la gajc Marcw, lod riga' zien ree bejn cabejdx canab reeman Dios.

13 Chi gulajw Béd ro' port, dxel brii tijb biin la Rode ziquiaam chunin.

14 Per chi bayünbeem cha' Béd, dád babaam, dxel luar nixhialim ro' port guin, baxüünm bicojnm guial za' Béd ro' port guin.

15 Abi' rëb reeman lojm:

—¡Rajc guijquil!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

16 Per Béd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman.

17 Abi' been Béd sen loj reeman din yacwëëz ro' reeman, dxel beman diidx xhienaag babëë Dios laaman ladxguiib. Abi' rëbaman loj reeman:

—Gol be ni guie loj Jacob në loj gra ree bën rliladx Jesucrist.

Dxelri briiman yagaj zëman lood ren.

18 Chi bareguiaal, ad radxejlt xhie güün ree suldad guin guial ad ragbeet reeman xhienaag barii Béd ladxguiib guin.

19 Dxel gunabee Herodes chigdiil reeman Béd, per ad badxejlt reeman laaman. Abi' chi gulox

gunabdiidx Herodes loj ree suldad guin xhien-aag gojc, gunabeeman gugüjt reeman laa reeman. Dxel brii Herodes Judea abi' bisobaman luguiedx Cesarea.

Güjt rey Herodes

²⁰ Balen Herodes bën Tiro nē ree bën Sidón, per baya'n ree bën guin diidx din chigneenē reeman laaman. Chi been reeman gan guneenē reeman bën brii laj Blasto zagdxe, tijb bën naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zēed ni raw reeman.

²¹ Bazuj Herodes xhie dxej guinieenēman laa reeman abi' dxej zii gojt xab zagdxeman, gurej loj xyagxhilaman lod rniabeeman, zianz guzuloj guneenēman laa reeman.

²² Dxel guzuloj gurixdiaj ree bën guin, rēb reeman:

—¡Ad bejntan canee, tijb diosan!

²³ Loj hor zii gajc badēē tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxe luar nuza't reeman Dios zagdxe.

²⁴ Per xtiidx Dios care'chzi care'chan gra ladczi abi' gra ladczi cayajcxhiey ree bën rililadx laaman.

²⁵ Chi ma badēēd ree Bernabé con Saulo ni guxhaal ree bën Antioquía, dxel baza reeman Jerusalén, binē reeman Waj, bën la gajc Marcw.

13

Guzuloj Bernabé con Saulo bigtie'ch reeman xtiidx Dios

¹ Loj ree b́en rlliladx Jesucrist, b́en zojb ree Antioquía, no'ch ree b́en rudëed xtiidx Dios loj ree bejn nê ree b́en rulüü xtiidxaman. La reeman Bernabé, Simón b́en rniee reeman Benya's, Lucio b́en Cirene, Saulo con Manaén b́en guni'snë Herodes tijbzi, b́en gunabee Galilea.

² Tijb dxej chi naba'n reeman, la'tgaj cabejdx canab reeman cuza't tée reeman Dios zagdxe, rëb xSprijt Dios loj reeman:

—Gol bacaabee Bernabé nê Saulo din güün reeman dxiin rënan güün reeman.

³ Chi gulox guba'n reeman gurejdx tée reeman Dios, dxel guxhoob yaa reeman guijc Bernabé con Saulo din gagnë Dios laa reeman abi' bazaadixnë reeman laa reeman.

Bernabé con Saulo wej reeman Chipre

⁴ XSprijt Dios naj b́en guxhaal Bernabé con Saulo, zë reeman Seleucia, ni guyu reeman loj barcw, zë reeman yuj la Chipre, ni riga' loj nijsdoo.

⁵ Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lën ree xyadoo ree b́en Israel. Nê Waj binë reeman din güünman laa reeman yudar.

⁶ Chi biza reeman guidib niz Chipre, dxel bidxin reeman Pafos. Ni bidxaagloj reeman tijb b́en Israel laman Barjesús, rajcaman guialbidxaa, rusqueeman bejn ree, rëbaman guial laaman naj b́en rudëed xtiidx Dios loj ree bejn.

⁷ Barjesús guin rnieenëman Sergio Paulo zagdxe, b́en naj gobernador Chipre, rignia' da'taman. Gurejdx gobernador guin Bernabé con Saulo guial rënman gucaagdiajgaman xtiidx Dios.

⁸ Per b́enbidxaa guin (con diidx grieg laman Eli-mas) guyenman nudxoonman guial nililadx Sergio Paulo xtiidx Dios.

⁹ Abi' Saulo, b́en la gajc Pab, rniabee xSprijt Dios luxdooman guidiblagaa, baguiaadxijchaman loj b́enbidxaa guin,

¹⁰ ŕebaman:

—¡Xi'n xindxab lúj, ganax rusquieel, ganax niguijdx rújnl, ad ŕentczil ni zagdxe! ¿Xt goc gudéel mod chinal ree bejn xnejz nali Dios?

¹¹ Yan gudéed Dios lúj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcajy Elimas abi' ad gojctri nuguaaman, dxel raguuilaman chu guiniaaz yaa-man guial ad rajctri ruguaaman.

¹² Chi baguiaa gobernador guin zian, dxel bililadxaman abi' dád badxa lojman ni balüü ree-man xcwent Dad Jesús.

Bidxin Pab con Bernabé niz Pisidia

¹³ Chi ma gudéd gojc zian, guyu Pab con ree xcompniaraman loj barcw luguiedx Pafos abi' zé reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén.

¹⁴ Dxel barii reeman guiedx Perge, zé reeman luguiedx Antioquía ni riga' niz Pisidia. Abi' dxej raziiladx ree b́en Israel, guyu reeman lén xyadoo ree b́en Israel zianz gurej reeman.

¹⁵ Dxel chi gulox biil b́en biil tib lajt loj libr bacaa Moisejs në loj libr bacaa ree b́en badéë xtiidx Dios loj ree bejn, gunee ree b́en rniabee lén yadoo guin, ŕeb reeman loj Pab con Bernabé:

—Bal xhie guiébidi loj ree b́en riga' guie din gudéedi consejw loj reeman, zajc guiébidan yan.

¹⁶ Dxel guzuli Pab, beenman sen loj reeman din yacwëéz ro' reeman, dxel rëbaman:

—Bén Israel, në gra ree bén rdxeb Dios, gol bacaagdiajg:

¹⁷ Dux Dios ree, nayajc ree bén Israel, gulejman dux béngulal ree abi' laaman been persi gojcxhiey reeman, chi sta zobj reeman zi'c benzit niz Egipto. Dxel con xguialrniabeeman babëëman laa reeman Egipto.

¹⁸ Abi' baslejnguicaman laa reeman loj tiuu ijz ni guzu reeman niz lod naj ganax yujbidx,

¹⁹ banijt tëëman gajdx ree nacion ni gure Canaán persi badëëman guidxliuj guin ree loj dux béngulal ree.

²⁰ Zian gojc loj tajp gayuu garol ijz, dxelri ba-caabee Dios juejs ree persi gunabee reeman laa reeman. Abi' Samuel bén badëéd xtiidx Dios loj ree bejn gojc xjuejs bigra reeman.

²¹ Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bén zëéd loj xdiaa Benjamín persi gunabeeman laa reeman tiuu ijz.

²² Chi bisüd Dios rey Saúl, dxel bazujman rey Davi. Abi' rëbaman: “Ma baguian guial Davi xi'n Isaí, nabanx zi'c rënan, güün tëëx cumplid da didxan guial güünx gra zi'c rënan.”

²³ Abi' yan zi'c gajczi rëb Dios, loj gajc xdiaa rey Davi, brij Jesús bén guxhaalaman din yabëëman bén Israel ree loj dol.

²⁴ Chi gad Jesús gui't, Waj bén baroobnijs bejn ree, bagojnman gra ree bén Israel guial rayal yayüjn reeman xgab por xtol reeman tiobnijs tëë reeman.

25 Chi ma zidyob yadiblagaa xguialnaban Waj, dxel rëbaman: “Ad najtan bën naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

26 'Yan, dugra ree nayajc ree xdiaa Abraham në gra los demazri ree bën rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol.

27 Per ree bën Jerusalén con ree xguxtis reeman ad bayagbeet reeman Jesús. Ad gogbee tëët reeman xhie rën guiëb xtiidx Dios ni bacaa ree bën badëed ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios.

28 Abi' majsi achetczi xtol Jesús guyu, per ni'czi zian rëb gajc reeman loj Pilato guial nabeeman guiëtaman.

29 Chi gulox been reeman gra zi'c ca loj xtiidx Dios xcwent Jesús, balet reeman laaman loj crüjz abi' baquie'ch reeman laaman.

30 Per Dios basban laaman,

31 dxel loj zien dxej balüülojman loj ree bën binë laaman chi briiman niz Galilea zëman Jerusalén, abi' yan laa reeman naj bën rniee por laaman loj ree bejn.

32 'Zeel caygojnan lëjt diidxza'c guin ree, guial promejs been Dios loj ree dux bëngulal ree,

33 ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'nan abi' diizd yan ma rajpil guialrniabee zi'cgajc naj.”

³⁴ Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: “Naj günle' lëjt zi'c benan promejs loj Davi.”

³⁵ Abi' rëb tëë stib lajt loj xtiidxaman: “Ad za-tiëjbtıl xhin xcuerp xi'nl, bën naya nali.”

³⁶ Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman.

³⁷ Per xcuerp Jesús bën basban Dios, ad guxintan.

³⁸ Zeel caygojnan lëjt compniar din gagbeedi guial por laaman ma yu' perdon par dux tol ree.

³⁹ Graczi bën rliladx Jesucrist ma gojc perdon gra xtol reeman ni ad gojct niajc perdon por ley badëë Dios loj Moisejs.

⁴⁰ Zeel gol gojp cudad chitëë saquidi zi'c bacaa ree bën badëë xtiidx Dios loj ree bejn, lod rëb:

⁴¹ Gol bacaagdiajg, lëjt bën ruze' ree da diidxan, gol badxalojdi gol gunidloj tëë.

Din loj ree dxej nabandi gün reen ni xt ni'quid zaliladxtidi,
majsi chu na laa reen lojdi.

⁴² Chi barii Pab con Bernabé lën xyadoo ree bën Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii.

⁴³ Chi barii ree bën guin lën yado guin, zien da't reeman binal Pab con Bernabé, zi'c ree bën Israel zi'c ree bën ad najt bën Israel, bën rën ree Dios zi'cgajc ree bën Israel. Abi' rëb Pab con Bernabé loj reeman din sudxi'ch reeman loj nejz zagdxe guredx Dios laa reeman guial rënman laa reeman.

44 Chi bidxin dxej ni raziiladx ree bejn, gra b́en luguiedx guin bado'p din gucaagdiajg reeman xtiidx Dios.

45 Per chi baguiaa ree b́en Israel zien da't ree bejn riga' yagaj, dxel guyu guialnadédloj luxdoo reeman abi' guzuloj caneeguijdx reeman canee t́eé reeman diidxguijdx loj Pab.

46 Dxel sin guialrdxeb badxi' Paban con Bernabé loj reeman, ŕeb reeman:

—Yaloj ĺejt rayal yagojnan xtiidxza'c Dios, ĺejt najdi b́en Israel, per yan ad ŕentidi gucaagdiajguidi laan, dxel ĺejt gajc culüü guial ad zajct yayalidi guialnaban tiblayaa con Dios. Yan ma yugtie'chan diidxza'c guin ree loj ree b́en ad najt b́en Israel.

47 Din zian gunabee dux Dad ree Dios dunujn, chi ŕebaman tib lajt loj xtiidxaman:

Nuzun ĺuj zi'c guij par gra ree nacion,
din chel guidibchicniaa loj guidxliuj chicojnl
xhienaag gac ree bejn perdon.

48 Chi biguiejn ree b́en ad najt b́en Israel zian, dxel babaa reeman, guzuloj ŕeb reeman guial zagdx naj xtiidx Dios, abi' graczi b́en ma naj yayal guialnaban tiblayaa con Dios, bililadx reeman xtiidxaman.

49 Zianan zeel bire'ch xtiidxza'c Dios guidib niz ni.

50 Per ree b́en Israel batiaalguiiw reeman b́engunaa rej ree laydoo zianczi naj t́eé reeman b́en zojbloj luguiedx zii, ńe ree xinguaaw naj gajc xin zojbloj, din sunal reeman Pab con Bernabé xt yabéé reeman laa reeman ni.

⁵¹ Dxel Pab con Bernabé gudxijp guxyuj guia' reeman zi'c tijb sen guial ad bazoobt ree b́en guin diidx, dxel źe reeman Iconio.

⁵² Per ree b́en bililadx Jesús niz ni, ma rniabee xSprijt Dios luxdoo reeman guidiblagaa abi' d́ad rabaa reeman.

14

Bidxin Pab con Bernabé Iconio

¹ Luguiedx Iconio, Pab con Bernabé guyu reeman ĺen xyadoo ree b́en Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree b́en Israel zi'c ree b́en ad najt b́en Israel.

² Per ree b́en Israel ad bililadxt batiaalguiiw reeman b́en ad najt ree b́en Israel persi guzuloj been reeman xgab mal por ree b́en rliladx Jesucrist.

³ Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rliladx reeman Jesucrist, laaman badéed guialrniabee loj reeman persi been reeman zien da't ree milagr ńe mazri ree ni ren, persi balüü Jesucrist guial diidxli naj ni ŕeb reeman xcwent Dios.

⁴ Per ree b́en luguiedx zii gojc reeman tio'p lala', garol reeman guzuné ree b́en Israel zagarol reeman guzuné apóstoles guin ree.

⁵ Dxel zi'c ree b́en Israel zi'c ree b́en ad najt b́en Israel, baya'n reeman diidx con ree guxtis din tilé reeman Pab con Bernabé gucaaguiaj t́eé reeman laa reeman.

⁶ Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, nē gra ree guiedx riga' niz ni,

⁷ gunee reeman xtiidxza'c Jesucrist.

Bacaaguiaj reeman Pab Listra

⁸ Luguiedx Listra guyu tijb xinguaaaw ad rajct rza, ad guzatzcix guial naxin guia'x diidz chi golix abi' zojbix

⁹ cucaagdiajguix ni rēb Pab. Chi baguiaa Pab laax, gogbeeman guial rliladxix par yayajquix.

¹⁰ Abi' gunee man rejs, rēbaman:

—¡Bisu, guzuli zagdxel!

Loj hor zii gajc gutiajs xin guin, guzulix abi' guzuloj cazax.

¹¹ Chi baguiaa ree bejn ni been Pab, guzuloj canee reeman rejs diidx Licaonia, rēb reeman:

—Dios naj ree zi'c bejn ma biguiajt lod nadxu' ree.

¹² Abi' rēb reeman guial Bernabé naj dios Júpiter, guiáad Pab naj dios Mercurio guial laaman naj bēn rniee loj reeman.

¹³ Abi' ro' guiedx guin niz lod ru bejn naj xyadoo Júpiter, dxel bixhioz yu' lēn yadoo guin binēman go'n ree con ree guiaa, abi' laaman con ree bēn guin guyēn reeman nugūjt reeman go'n guin ree din niēn reeman apóstoles guin ree zi'c xdios reeman.

¹⁴ Per chi gogbee Pab con Bernabé zian, gudixya' xab reeman, guzēēb reeman lađ ree bēn guin, rbixdiaj reeman rēb reeman:

¹⁵ —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lējt? Awa par zian-clan zio'pan din yanan lojdi din yasa'ndi ni rüjndi,

din achetczi lasajc reen. Mejorli gol binal xnejz Dios naban, b́en been xanyabaa nē guidxliuj nētēē nijsdoo con gra ni yu' loj reen.

¹⁶ Tiamp gulal Dios baslaa been ree bejn ni guyēntzi reeman.

¹⁷ Per ni'czi zian, zianczi balüüman chu najman por ree ni zagdxē ni rüjnman. Din laaman naj b́en razaladx guia con guialnaza'c abi' razaladxaman ni radaaw ree din chu' du luxdoo ree zagdxē.

¹⁸ Chi rēb Pab con Bernabé zian, con ree diidx guin penz been reeman gan badxoon reeman guial nugüjt ree b́en guin go'n guin ree din niēn reeman laa reeman zi'c xdios reeman.

¹⁹ Per bēlzi ree b́en Israel zobj Antioquía nē Iconio, chi bidxin reeman luguiedx Listra been reeman gan batiaalguiiw reeman b́en luguiedx guin ree. Dxel bacaaguiaj reeman Pab abi' gunaladx reeman ma güjtaman abi' guxoobyuj reeman laaman, babēē reeman laaman luguiedx guin.

²⁰ Per chi bido'p ree b́en rliladx Jesucrist gadēd lod naga'man, dxel bixchēman, bayuman luguiedx guin stijb. Chi bareguiaal briinēman Bernabé zē reeman luguiedx Derbe.

²¹ Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Listra nē Iconio nētēē Antioquía.

²² Luguiedx zii ree badxe' reeman luxdoo ree b́en rliladx Jesucrist. Rēb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios.

²³ Abi' tēē loj tijb gaj ree guiedx guin bacaabee reeman bengol nabee ree loj ree bēn rliadx Jesucrist. Zianz chi gulox guba'n reeman gurejdx tēē reeman Dios, dxel basa'n reeman laa reeman con Dad Jesús bēn ma bililadx reeman.

Badxin ree Pab con Bernabé Antioquía ni riga' niz Siria

²⁴ Chi baza ree Pab con Bernabé niz Pisidia, bidxin reeman niz Panfilia.

²⁵ Abi' guneē reeman xtiidx Dios luguiedx Perge, dxel zē reeman guiedx Atalia.

²⁶ Ni guyu reeman loj barcw zē reeman Antioquía, luguiedx lod basa'n ree los demazri ree bēn rliadx Jesucrist laa reeman con Dios din gagnēman Pab con Bernabé din guitie'ch reeman xtiidxaman. Abi' dxiin guin naj ni ma baloox reeman.

²⁷ Dxel chi bidxin reeman Antioquía, bato'p reeman bēn rliadx ree Jesucrist, persi be reeman diidx loj reeman gra ni been Dios con laa reeman, xhie tēē naag guxhalaman nejz din chililadx ree bēn ad najt bēn Israel Jesucrist.

²⁸ Ni guzu Pab con Bernabé xchej, guzunē reeman bēn Antioquía rliadx ree Jesucrist.

15

Guyu gabilt Jerusalén

¹ Lēn ree dxej zii bidxin bēlzi ree bēn Judea luguiedx Antioquía. Abi' guzuloj rēb reeman loj ree bēn rliadx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon.

² Dxel Pab con Bernabé dád zro' gudijldiidx reeman con ree bèn guin. Dxel bacaabee ree bèn rliladx Jesús Pab në Bernabé, në ree ben ren din che reeman Jerusalén chigneenë reeman apóstoles guin ree, con ree bengol rniabee loj ree bèn rliladx Jesucrist din guguaa reeman xhienaag güün reeman xcwent sen guin.

³ Abi' badxe'nejz ree bèn Antioquía rliladx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bèn rliladx ree Jesucrist, bèn zobj ree niz ni guial ma rliladx ree bèn ad najt ree bèn Israel xtiidx Dios. Abi' graczi bèn ma rliladx Jesucrist niz ni, dád babaa reeman chi biguiejn reeman zian.

⁴ Chi bidxin Pab con Bernabé Jerusalén, dxel baca' ree bèn rliladx Jesucrist laa reeman, con ree apóstoles, con ree bengol rniabee loj ree bèn rliladx Jesucrist. Abi' be ree Pab diidx con Bernabé gra ni been Dios con laa reeman.

⁵ Per yu' ree bènfarisew ma rliladx Jesucrist, guzuli reeman abi' rëb reeman:

—Bèn ad najt ree bèn Israel abi' ma rliladx reeman Jesucrist, rüjn naguiejn chu' reeman sen ru ree bèn Israel, gagbee tëë reeman guial rayal chinal reeman xley Moisejs.

⁶ Dxel bado'p ree xi apóstoles Jesús con ree bengol rniabee loj ree bèn rliladx Jesucrist din guidoon xhienaag güün reeman.

⁷ Guial tant canee reeman por zian, dxel guzuli Bëd, rëbaman loj reeman:

—Gradi compniar raliduladx ree Jesucrist, lëjt ragbee guial diizd gocli gulej Dios naj lojdi din

chignen xtiidxza'c Jesucrist loj ree b́en ad najt b́en Israel din chililadx reeman laaman.

⁸ Abi' Dios b́en núnbee luxdoo graczi ree bejn, balüüman guial naj reeman xbejnman guial ma badëéd xSprijtaman loj reeman zi'cgajc banee-man du loj ree.

⁹ Zi'c ruguiaa Dios dunuj ree ziangajc ruguiaa-man laa reeman, din zi'c basiaman du luxdoo ree ziangajc basiaman luxdoo reeman guial ma rililadx reeman Jesucrist.

¹⁰ Yan, ¿chexc zeel ad ridxga'tidi ni ma been Dios abi'za rniabeedi chinal ree b́en rililadx Jesucrist ley ni ni'qui dunuj ree ni'qui dux béngulal ree ad gojct naguieen ree zi'c rniabee ley guin?

¹¹ Dunuj ree rayagbee guial por ni zagdx ni been Dad Jesucrist, been Dios dux tol ree perdon zi'cgajc laa reeman.

¹² Dxel bacwëéz ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree b́en ad najt b́en Israel.

¹³ Chi gulox gunee reeman, dxel nëgajc Jacob rëb:
—Gradi compniar raliduladx ree Jesucrist, gol bacaagdiajg:

¹⁴ Simón Béd be diidx duloj ree xhienaag guzuloj gulej Dios b́en ad najt ree b́en Israel din gac ree-man xbejnman.

¹⁵ Gra ni ma gojc naj zi'c ni bacaa ree b́en badëë xtiidx Dios loj ree bejn loj xtiidxaman lod rëb:

¹⁶ Chi ma gojc zian,
yayünxhiey ree da bejnan mazri zi'c goc chi naban
Davi,
gacxhiey reeman por ree b́en sta naban,

zi'c guban ree bejn xtiamp Davi
abi' por laa reeman yayajcxhiey ree da bejnan.

17 Din yaguuil ree los demazri ree bejn guial guiën
reeman naj,

gra ree bén nacion ren, yaguuil guial guiën reeman
naj,

bén ma gule reen din gac reeman da bejnan,
bén guiguiejn ree guza't ree bejn naj.

18 Zian na Dios, bén cugojn bejn ree gra ree nine
diizd tiamp gulal.

19 'Zeel naladxan ad rayalt chu güün naguiejn
bén ad najt ree bén Israel par chinal reeman ley,
laa reeman guial ma basa'n xcostumbr reeman
par chinal reeman xnejz Dios.

20 Yan con yaxhaal ree tijb gui'ch loj reeman
guial ad rayalt gaw reeman ni ragle' loj ni naj
xdios reeman, ad rayal tēet sunē reeman ben ren
bén ad najt lacheel reeman, ad rayalt gaw reeman
bēel rberejn ni'qui rejn.

21 Zian yaguie'ch ree loj reeman, din diizd tiamp
gulal tijb gaj guiedx yu' bén rulüü laa reeman
xhie rēn guiēb xley Moisejs ni rool reeman lēn ree
yadoo dxej raziiladx ree bejn.

22 Dxel apóstoles guin ree con ree bengol rniabee
loj ree bén rliladx Jesucrist, con los demazri ree
bén rliladx Jesucrist, rēb reeman gucaabee ree-
man bén guixhiaalnē reeman Pab con Bernabé
din che reeman Antioquía. Abi' bacaabee reeman
Judas, bén la gajc Barsabás, nē Silas, laa reeman
rajp guialrniabee loj ree bén rliladx Jesucrist.

23 Abi' guxhaalnē reeman laa reeman tijb gui'ch
ni rēb:

“Dunujn nayajcan xi apóstoles Jesús, con ree bengol rniabee loj ree bén rliadx laaman, në los demazri ree bén rliadx laaman. Ragajpdiozan lëjt bén ad najt ree bén Israel, per nayajc ree compniar raliduladx ree Jesucrist, lëjt zojbidi Antioquía, në los demazri ree bén zojb ree niz Siria nëtëë niz Cilicia.

²⁴ Ma bayagbeen guial yu' ree bén duladxan brii sin dux tiidxbeen, abi' cagu'nawëëg reeman lëjt con xtiidx reeman persi ad radxejlt xhie güündi guial na reeman lojdi rayal chu'di sen ni ru ree bén Israel güün tëedi zi'c rniabee xley Moisejs, per ad dunujtan baxhaal laa reeman.

²⁵ Zeel bado'pan abi' raguie'chan guial zagdxe naj yacaabee bëlzi dux compniaran ðin guidganaj reeman lëjt, guidnë tëë reeman tio'p dux compniaran, Bernabé con Pab, bén rayën ða'tan.

²⁶ Zien ree ni guijdx cuhaagloj reeman guial cayüjn reeman sirv loj Dad Jesucrist.

²⁷ Dxel cayxhaalnë'n laa reeman Judas con Silas, laa reeman na lojdi gra con quijb xtiidx reeman.

²⁸ Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lëjt ni güündi, ni rayalzi cu'guijquidi naj guial,

²⁹ ad gawidi xbëel ree be ni rbe'c ree bejn loj ni naj xdios reeman, ad gaw tëedi bëel rberejn, ni'qui rejn, ad sunëdi ben ren bén ad najt lacheelidi. Bal gapidi cudad ad züjntidi gra ree nine, zagdxequi güündi. Gagnë Dios lëjt.”

³⁰ Zian gojcan, gui'ch guin naj ni guxhaalnë reeman guidap ree bén guin par luguiedx Antioquía. Ni bato'p reeman bén rliadx ree Jesucrist abi' bayü reeman gui'ch guin loj reeman.

³¹ Chi biil reeman laan, dád nix guyu luxdoo reeman por ree diidx zagdxe ni zëed lojn.

³² Abi' Judas con Silas guial nëgajc reeman rajp quiarguiejn par gudëed reeman xtiidx Dios, dxel zien naj ni guneenë reeman bën rliladx ree Jesucrist, bagu' reeman luxdoo reeman con xtiidx reeman.

³³ Chi ma gudëd zien dxej za' ree Judas con Silas ni, bazaadiidxnë ree bën rliladx Jesucrist laa reeman din yaguiaj reeman lod za' ree bën guxhaal laa reeman, rëb reeman loj reeman: “Chignë Dios lëjt zagdxe.”

³⁴ Per Silas beenman xgab baya'nman ni mazri.

³⁵ Abi' Pab con Bernabé baya'n reeman Antioquia mazri, laa reeman con ree ben ren basnuu balüü reeman gutie'ch tëë reeman xtiidxza'c Jesucrist loj ree bejn ni.

Ni barojp volt brii Pab biglüüman xtiidx Dios guiedx ren ree

³⁶ Chi gudëd tio'p choon dxej, dxel rëb Pab loj Bernabé:

—Yo' stijb yugnaj dux compniar ree bën rliladx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

³⁷ Bernabé guyën ninë reeman Waj, bën la gajc Marcw.

³⁸ Per Pab ad cwëjbt ninë reeman laaman, din chi we reeman niz Panfilia guro'nldxaman laa reeman, ad binëtraman laa reeman.

³⁹ Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binë Bernabé Marcw, guyu reeman loj barcw zë reeman yuj la Chipre ni riga' loj nijsdoo,

⁴⁰ Dxel gulej Pab Silas din chinëman laaman abi' rëb los demazri ree bën rliladx Jesucrist loj reeman guial chinë Dios laa reeman zagdx.

⁴¹ Zianz gudëd reeman niz Siria në niz Cilicia, ragu' reeman luxdoo ree bën rliladx Jesucrist niz ni.

16

Bine ree Pab con Silas Timoteo

¹ Chi bidxin Pab con Silas guiedx Derbe në guiedx Listra abi' Listra bidxaagloj reeman tijb bën rliladx Jesucrist, laman Timoteo, xniaaman naj bën Israel, nëman rliladx Jesucrist guiáad xdadaman naj bën grieg.

² Graczi ree bën rliladx Jesucrist, bën zobj ree guiedx Listra në Iconio ruza't laaman zagdx.

³ Dxel rëb Pab chinëman Timoteo, per yaloj badxe'man laaman sen ni ru ree bën Israel, chitëë xhie guiëb ree bën Israel riga' niz ni, din gra ree-man ragbee guial naj xDadaman bën grieg.

⁴ Graczi ree guiedx ni gudëd reeman bagojn reeman bën rliladx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree bën rliladx laaman Jerusalén.

⁵ Zianan zeel guzudxi'ch ree bën niz ni loj guial-rliladx reeman Jesucrist, abi' guixie guixie gojcx-hiej mazri ree bën rliladx laaman.

Balüüloj tijb bën Macedonia loj Pab

⁶ Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudëdzinejz reeman niz Frigia në niz Galacia

⁷ abi' bidxin reeman niz Misia. Ni been reeman xgab nej reeman niz Bitinia, per ad cwëjb gajct xSprijt Dios nej reeman niz ni.

⁸ Dxelri gudëdzinejz reeman niz Misia, bidxin reeman guiedx Troas.

⁹ Yagaj, guxhinzii guzajc Pab zi'c rulüü cane'xhchaalaman. Baguiaaman tijb xinguaaw zëed niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

¹⁰ Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bën cabejdx dunujn niz ni par yatie'chan xtiidxza'c Jesucrist.

Bidxin ree Pab con Silas Filipos

¹¹ Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis.

¹² Yagaj badxoon bio'n Filipos, guiedx mazri zojbloj niz Macedonia, per Rom rniabee guiedx zii, ni badxu'n bëlzi ree dxej.

¹³ Abi' tijb dxej raziiladx ree bejn, bariin luguiedx guin bio'n tijb ruguiiwro', lod rayagbeen rado'p ree bën Israel par cwedx reeman Dios. Abi' badxu'n baneen xtiidxza'c Jesucrist loj ree béngunaa bado'p yagaj.

¹⁴ Tijb ree béngunaa guin la Lidia, najman bën Tiatira, ruto'man lajd zagdxe ni culor murad. Di-idxli rdxebaman Dios abi' cucaagdiajgaman. Dios guxhal xquiarguiejnman din gucaagdiajgaman zagdxe gra ni rëb Pab.

15 Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rliladxidi guial ma rliladxan Jesucrist, gol baya'n lidxan.

Dxel beenman naguiejn baya'nan lidxaman.

16 Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdoom, abi' por xguialrniabee xindxab guin rnieeya'm guiáad ree bén guzii laam dád zro' milia rüjn reeman gan por dxiin guin.

17 Dxel bidnalim Pab con dunujn, rbidxa'm rëbim:

—Bén guie ree rüjn xchiin Dios yu' xanyabaa, laa reeman gugojn lëjt xhienaag gaquidi perdon.

18 Zien dxej da't beenm zian, xt chi balenya' Pab, dxel bayejcaman rëbaman loj xindxab yu' luxdoom:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdoom.

19 Per chi gogbee ree bén guzii laam guial ad zactri güünm gan milia par laa reeman, dxel gunaaz reeman Pab con Silas, binë reeman laa reeman roylay loj guxtis.

20 Chi bayü reeman laa reeman loj ree guxtis guin, rëb reeman:

—Xin Israel guie ree rbëë reex wadijl du ladx ree,

21 abi' rulüü reex costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

²² Dxel wajs gra ree bén guin contr laa reeman, abi' gunabee ree guxtis guin gulëë xab Pab con Silas din quin reeman laa reeman con var.

²³ Chi gulox gudijn da't reeman laa reeman, dxel bilu' reeman laa reeman ladxguiib abi' gunabee reeman bén rajp ro' ladxguiib guin din gapdxi'chaman laa reeman.

²⁴ Chi biguején bén rajp ro' ladxguiib guin zian, dxel bilu'man laa reeman xt lën cuart bigra yu' lën ladxguiib guin, guxhiiman guia' reeman loj tabl naal con caden.

²⁵ Per garol guiaal, la'tgaj cabejdx canab Pab con Silas Dios, cayool tëë reeman cant par laaman, dxel cucaagdiajg los demazri ree bén yu' ladxguiib guin.

²⁶ Dxel tijbzi golp guzuloj xudoxh, niz ni niz guie rurlia xcimiant ladxguiib guin. Loj hor zii gajc bixal gra ree xpontan abi' baxiec ree caden naxii gra ree bén yu' lënan.

²⁷ Chi baban bén rajp ro' ladxguiib guin abi' baguiaaman zojbyal gra ree xpontan, gulëë xi espadaman din nugüjt laagajcaman guial gunal-adxaman gra ree bén yu' ladxguiib guin ma baxüün.

²⁸ Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

²⁹ Laa gunab gajc bén guin tijb guij, dxel ruxüünman guyuman, rnijman guial rdxebaman, bigzuxibaman loj Pab në loj Silas.

³⁰ Dxel babëëman laa reeman, gunabdiidxaman loj reeman, rëbaman:

—Dad, gol guna, ¿xhie rayal günan din güün Dios naj perdon?

31 Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

32 Abi' be reeman xtiidx Dios lojman con loj gra ree bën zobj lidxaman.

33 Zianz guxhin zii gajc gudiibaman lod nadxeelguijdx reeman, dxel gurobnijsaman con gra xfamilaman.

34 Abi' bignëman laa reeman lidxaman, dxel badëëman ni gudaw reeman. Guiáad laaman dád nix yu' luxdooman con gra xfamilaman Guial ma rliladx reeman Dios.

35 Chi bareguiaal, guxhaal ree guxtis guin suldad ree persi biguiedx reeman loj bën rajp ro' ladxguiib guin guial guslaaman Pab con Silas.

36 Abi' rëb bën rajp ro' ladxguiib guin loj Pab:

—Ma na ree guxtis guial guslaan lëjt. Yan ma zajc yaguaiajdi ad chu'di xgab.

37 Per rëb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bën guiedx, ni'quid ba-neet reeman mod nadëëdan cwent loj reeman con badxe' reeman dunujn ladxguiib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalëë reeman dunujn.

38 Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas.

39 Dxel wej reeman bignab reeman perdon loj Pab con Silas babëë tëë reeman laa reeman, rëb reeman loj reeman din yaza reeman luguiedx guin.

⁴⁰ Chi barii reeman ladxguiib, wej reeman lidx Lidia. Zianz chi gulox guneenë reeman los demazri ree bën rlliladx ree Jesucrist din chu' luxdoo reeman sudxi'ch reeman loj ni rlliladx reeman, dxel baza reeman.

17

Bidxin ree Pab con Silas Tesalónica

¹ Chi zë Pab con Silas, gudëd reeman niz Anfípolis në niz Apolonia zianz bidxin reeman luguiedx Tesalónica lod yu' tijb xyadoo ree bën Israel.

² Abi' zi'c goc xcostumbr Pab, wejman lën yadoo guin, choon dxej raziiladx ree bejn. Wejman bigneenëman laa reeman xtiidx Dios.

³ Bagojnman balüü tēëman laa reeman loj xtiidx Dios lod rëb guial naj sagdiaj Cristo, abi' chi ma güjtaman yabanman stijb. Rëbaman loj reeman:

—Jesús ruzat gajcan lojdi, laagajcaman naj Cristo din yabëëman dunuj ree loj dol.

⁴ Yu' ree bën Israel guin bililadx abi' bachajg reeman Pab con Silas. Në zien ree bën grieg rën Dios bililadx, nëtëë zien ree béngunaa zojbloj bililadx Jesús.

⁵ Per ree bën Israel ad bililadxt Jesucrist, gudëdloj reeman abi' bato'p reeman benmal ziza ree lunejz persi gulëë reeman wadijl luguiedx guin, abi' guyu reeman lidx Jasón, raguiil reeman Pab con Silas din cwëë reeman laa reeman guzuj reeman laa reeman loj ree bën guiedx guin.

⁶ Per guial ad badxejlt reeman laa reeman yagaj, dxel guxoobyuj reeman Jasón në ree ben ren

bén rliladx Jesucrist, binë reeman laa reeman loj guxtis, rbixdiaj reeman, rëb reeman:

—Tio'p ree xin cabëë wadijl guidib guidxliuj, ma bi't reex guie,

⁷ abi' lidx Jasón zojb reex. Laa reex con gra ree bén nuchajg laa reex, ad cayüjnt reex zi'c rniabee xley rey César, din rëb reex guial yu' zatijb rey la Jesús.

⁸ Chi biguiejn ree guxtis guin zian con ree bejn, gra loj xgab been reeman.

⁹ Per Jasón con los demazri ree bén guyu ladxguib guin gudijx reeman loj ree guxtis guin, dxel baslaa reeman laa reeman.

Bidxin Pab con Silas Berea

¹⁰ Guxhinzii gajc, guxhaal ree bén rliladx Jesucrist Pab con Silas luguiedx Berea. Chi bidxin reeman ni, wej reeman lën xyadoo ree bén Israel.

¹¹ Mazri benza'c naj ree bén Israel guin guial loj ree bén Israel zojb Tesalónica. Con gan bacaagdi-ajg reeman ni rëb Pab. Abi' guixie guixie rusiid reeman xtiidx Dios, din gagbee reeman waliqui ni rëb Pab ya.

¹² Zeel dád zien reeman bililadx Jesucrist, nëtëë zien bén grieg bililadx laaman zi'c ree xinguaaw zi'c ree béngunaa zojbloj niz ni.

¹³ Chi gogbee ree bén Israel zojb Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiw reeman bejn ree din guidxe'ch reeman Pab.

¹⁴ Per ree bén rliladx Jesucrist ad goglaat reeman, laa guxhaal gajc reeman Pab niz ro' nijsdo.

Guiáad Silas con Timoteo baya'n reeman mazri Berea.

¹⁵ Abi' ree bën biglu'nejz Pab, xt Atenas binë reeman laaman. Chi baza reeman ni, bignë reeman xruson Pab din diob che Silas con Timoteo chinal reeman laaman.

Bidxin Pab Atenas

¹⁶ La'tgaj cabëz Pab guidxin Silas con Timoteo luguedx Atenas, guyunayaman guial baguiaaman zien da't ni rajp ree bejn niz ni zi'c dios.

¹⁷ Zeel wejman lën xyadoo ree bën Israel bigneenëman laa reeman në los demazri ree bën rën Dios zi'c ree bën Israel, guixie guixie rnieenëman chutëez bën rdxaglojman niz galay guiedx guin.

¹⁸ Guneenë tëëman garol ree bën zinal ni balüü bën brii laj epicureo, në za garol ree bën estoicos. Abi' yu' reeman rëb:

—¿Xhienin rniee xin guin zeel rniee da'tix?

Yu' tëë reeman rëb:

—Rulüü xtiidx dios ren ree bën ad naguieenbeet ree catie'chix.

Rëb reeman zian guial caneenë Pab laa reeman xtiidxza'c Jesucrist në xcwent guial babanman stijb.

¹⁹ Dxel binë reeman Pab tijb luar la Areópago, lod rado'p reeman. Abi' gunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie?

²⁰ Din rül diidx du lojn ni ad rayagbeetan, zeel rayënan yayagbeen xhie rën guiëban.

21 Graczi ree b́en Atenas, con los demazri ree benzit zobj ni, zianczi za' reeman zian. Ruladx reeman téd reeman dxej, gucaagdiajg reeman o gü reeman ni naj ree nicüb.

22 Dxel guzuli Pab galay reeman lod la Areópago, rëbaman:

—Bén Atenas, por graczi ni ma baguian, ma gogbeen guial dád zien ree xdiosidi.

23 Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

24 Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lën yadoo ni rüjn ree bejn.

25 Ad riaadx tēetaman chu güün xhienin par laaman, din laaman naj b́en razaladx bi nabajnnë' ree, laaman razaladx guialnaban duloj ree në ree ni rayaadx ree.

26 Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tēē cwe reeman.

27 Din yaguiil reeman Dios majsi zi'c chi rgan bejn chi raguuilaman xhienin, zian güün reeman din yadxejlaman. Majsi diidxliczi ad zijtt za'man par gra bejn.

28 Din por Dios nabajn ree, por laaman raniib ree radxoo tēē ree, por laaman nadxu' ree loj guidxliuj. Zi'c rëb tēē ree xbénrignia'di, chi rëb reeman: “Dunuj ree nayajc xi'n Dios.”

²⁹ Zeel bal nayajc ree xi'n Dios, ad rayalt yaguieen ree xgab guial Dios najnë or, o plajt, o guiaj ya zi'c naj ni rüjn ree bejn zi'c naj xixgab reeman.

³⁰ Tiamp gulal cwëjb Dios been ree bejn zi'c naladx reeman guial achetczi ragbee reeman, per yan gra ladczi canabeeman gra ree bejn din yayüjn reeman xgab por xtol reeman.

³¹ Din Dios ma gulej tijb dxej ni yadëed ree bejn cwent lojman, dxej ni güün xguialguxtisaman. Ma gulej tëëman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

³² Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—¡Zatijb dxej yasnuu yacaagdiajgan ni canal!

³³ Dxel baza Pab lod za' reeman.

³⁴ Per yu' reeman bachajg laaman, abi' bililadx reeman xtiidx Dios. Loj reeman no'ch tijb bën zobjloj lën Areópago laman Dionisio, në stijb béngunaa la Dámaris në ree ben ren.

18

Bidxin Pab Corinto

¹ Dxel brii Pab Atenas zëman Corinto.

² Yagaj bidxaaglojman tijb bën Ponto laman Aquila, zëëdaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree bën Israel Rom. Dxel wej Pab bitixlojman laa reeman.

³ Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel

baya'nnëman laa reeman persi been reeman dxiin guin.

⁴ Abi' beegaj dxej raziiladx ree bën Israel, rej Pab rigneeman xtiidx Dios lën xyadoo ree bën Israel, zi'c ree bën naj ree bën Israel zi'c ree bën ad najt bën Israel raguiilaman mod din chililadx reeman ni rëbaman.

⁵ Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeaman loj ree bejn, balüü tëëman bën Israel ree guial Jesús naj Cristo bën cabëz reeman.

⁶ Per guzuloj bidxe'ch reeman Pab abi' gunee reeman diidxguijdx contr laaman. Dxel gudxijp xabaman zi'c tijb sen guial ad ruzoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguien xtiidx Dios loj ree bën ad najt bën Israel.

⁷ Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman.

⁸ Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Në zien ree bën Corinto bililadx chi biguiejn reeman xtiidx Jesucrist abi' gurobnijs reeman.

⁹ Tijb guxhin balüüloj Dios loj Pab, rëbaman loj-man:

—Ad rdxebil, basnuu gunee da diidxan, ad gucwëëzil,

¹⁰ naj za'në' lüj, achutczi zajc güün lüj xhienin, din luguiedx guie zien da't bejn naj par naj.

11 Zianan zeel baya'n Pab Corinto tibijz garol, balüüman bën guin ree xtiidx Dios.

12 Per chi goc Galión gobernador Acaya, bën Israel ree bachajg lasa' reeman persi gunaaz reeman Pab binë reeman laaman loj gobernador guin,

13 rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

14 Ma niniee Pab, chi gunee Galión rëbaman loj ree bën Israel guin:

—Bal niajcan tijb falt o tijb guialquia narooob beenman zeel zidnëdi laaman, züncwentan lëjt.

15 Per najn por ree diidx në por laj ree bejn nëtëë por xleydi, zeel lëjt gajc gol gunaj xhienaag güündi, ad rëntan günan guialguxtis xcwent ree ni guin.

16 Abi' laa babëë gajcaman laa reeman roylay guin.

17 Dxel yagaj gajc gunaaz gra reeman Sóstenes, bën rniabee lën xyadoo ree bën Israel abi' gudijn reeman laaman, per ni'quid beencwentt gobernador guin laa reeman.

Badxin Pab Antioquía

18 Zienri ree dxej baya'n Pab Corinto. Dxel bazaadiidx nëman los demazri ree bën rliladx Jesuscríst, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Cencrea bagaj guiyc Pab, por tijb promejs ni beenman.

19 Chi bidxin reeman Éfeso, ni basa'n Pab Priscila con Aquila, abi' wejman lën xyadoo ree bën Israel

zobj ree ni, bigneenëman bën Israel rado'p ree lën yadoo guin.

²⁰ Abi' guyën reeman niaglaa Pab ni mazri, per ad cwëjbtaman.

²¹ Rëbaman loj reeman:

—Ma yaya'n, bal gagnë Dios naj, guidganan lëjt stijb.

Dxel guyuman loj barcw bazaman Éfeso.

²² Chi bidxinman Cesarea, dxel wejman Jerusalén bicajpdiozaman bën rliladx ree Jesucrist, dxelri zëman Antioquía.

²³ Chi ma gojc xchej za'man Antioquía, dxel briiman zatijb. Wejman tijb gaj ree guiedx riga' niz Galacia në niz Frigia, ragu'man luxdoo gra ree bën rliladx Jesucrist.

Gutie'ch Apolos xtiidx Dios Éfeso

²⁴ Tiamp zii bidxin tijb bën Israel luguiedx Éfeso, laman Apolos, gojlaman Alejandría. Dád radxeljaman diidx par guinieeman abi' dád rajcaman xtiidx Dios.

²⁵ Basiidaman xtiidx Dios, dxel con gan balüüman bejn ree, zagdxe tëë rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman.

²⁶ Abi' Apolos, sin guialrdxeb guzuloj caneeman xtiidx Dios loj ree bën Israel lën xyadoo reeman, zianz chi biguiejn Priscila con Aquila ni rëbaman, dxel bignë reeman laaman lidx reeman. Ni balüü reeman laaman persi basnuu basiidaman mazri xtiidx Dios.

²⁷ Chi been Apolos xgab cheman niz Acaya, gra ree b́en rliadx Jesucrist b́en za'ně laaman, badxe' reeman luxdoodan din cheman, abi' guxhaal reeman tijb gui'ch loj ree b́en rliadx Jesucrist b́en zobj ree niz Acaya din yaca' reeman laaman zagdx chi guidxinman niz ni. Chi bidxinman niz Acaya dád beenman yudar b́en ma rliadx ree Jesucrist guial gogně Dios laa reeman.

²⁸ Din delant loj gra ree bejn rēbaman guial ad laat zē ree b́en Israel, abi' achutczí gojc nadxi' xtiidxaman guial graczi ni rēbaman naj diidxli, balüü tēēman loj xtiidx Dios gra luar lod rēb guial Jesús naj Cristo b́en gulējz reeman.

19

Bidxin Pab Éfeso

¹ La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidx-aaglojman bēlzi ree b́en rliadx Jesucrist.

² Abi' gunabdiidxaman loj reeman rēbaman:

—¿Guyu xSprijt Dios luxdoodi ya chi bililadxidi?

Badxi' reeman laan rēb reeman:

—Ni'quid waguejntan guial yu' xSprijt Dios.

³ Dxel rēb Pab loj reeman:

—¿Xhieza naag gurobnijsidi?

Badxi' reeman laan rēb reeman:

—Barobnijsan zi'c balüü Waj bejn ree.

⁴ Dxel rēb Pab loj reeman:

—Walican baroobnijs Waj bejn, b́en bayüjn ree xgab por xtol reeman. Per rēbaman guial rayal chililadx reeman b́en zēēd xijchaman abi' laaman naj Jesús, b́en naj gajc Cristo.

⁵ Chi biguiejn reeman zian, dxel gurobnijs reeman por Dad Jesús.

⁶ Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudëéd reeman xtiidx Dios loj ree bejn.

⁷ Loj gra reeman naj cost chiptio'p xinguaaw.

⁸ Choon bëew wej Pab lën xyadoo ree bén Israel zojb ni. Sin guialrdxeb guneenëman laa reeman xtiidx Dios, guneenëman laa reeman abi' beenman naguiejn din güünman gan chililadx reeman xhienaag naj xguialrniabee Dios.

⁹ Per garol reeman gojc nad ad guyënt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bén ma rililadx Jesucrist, binëman laa reeman lën tijb xzcuel bén la Tiranno. Ni balüüman laa reeman guixie guixie,

¹⁰ loj tio'p ijz beenman zian. Abi' graczi ree bén zojb niz Asia, zi'c ree bén Israel zi'c ree bén ad najt bén Israel, bacaagdiajg reeman xtiidx Dad Jesucrist.

¹¹ Abi' por xguialrniabee Dios been Pab milagr narooob ree,

¹² xt ree xbay Pab në ree lajd rtia lojman zi'c lantar rignë reeman loj ree bénragxuu, abi' rayajc reeman guialguijdx ni rajc reeman, rarii tëë ree xindxab yu' luxdoo reeman.

¹³ Per guyu bëlzi ree bén Israel ziza rabëë reeman xindxab luxdoo ree bejn, abi' guyën reeman nüjnnë reeman dxiin laj Dad Jesucrist dxel rëb reeman loj ree xindxab guin:

—¡Por Jesús b́en ruza't Pab, rniabeen l'ejt, gol barii!

¹⁴ Zian naj ni been gajdx ree xi'ngaan tijb b́en Israel la Esceva, b́en goc tijb bixhioz rniabee ree bixhioz.

¹⁵ Per tib volt tijb ree xindxab guin badxi' xtiidx reeman r'ebaman:

—N'ünbeen Jesús ragbee t'een chunin naj Pab, per l'ejt ni'quid n'ünbeetan l'ejt.

¹⁶ Abi' b́en yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman l'enu guin, ziladzi reeman nadxeelguijdx t'ee reeman.

¹⁷ Graczi ree b́en zojb Éfeso, zi'c ree b́en Israel zi'c ree b́en ad najt b́en Israel, gogbee reeman gojc zian, dxel dád bidxeb reeman abi' baza't reeman Dad Jesús zagdx.

¹⁸ N'ē zien ree b́en rliladx Jesucrist bidxin abi' delant loj gra ree bejn baneero' reeman gra ni mal ma been reeman.

¹⁹ N'ēt'ee zien ree b́en been guialbidxaa bidxinnē xlibr reeman abi' baze'c reeman laa reen delant loj gra ree bejn. Chi bab'ēē reeman cwent plac lasajc ree libr guin dxel cost t'ü'pchii mil milia plajt lasajc reen.

²⁰ Abi' zian bire'ch xtiidx Jesucrist biguien t'ee xguialrniabeeman.

²¹ Chi ma gud'ed gojc zian, been Pab xgab cheman niz Macedonia n'ē niz Acaya xt yadxinman Jerusalén. R'eb t'eeēman guial chi ma wejman Jerusalén dxelri cheman n'ē Rom.

²² Abi' guxhaalaman tio'p bén rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

Gojc nadxeb Éfeso

²³ Lën ree dxej zii been ree bén Éfeso nadxeb por xtiidx Jesús.

²⁴ Din Demetrio, bén rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bén rüjnnëman dxiin.

²⁵ Dxel bato'paman laa reeman con ree ben ren bén rüjn gajc ree lasa' dxiin guin, abi' rëbaman loj reeman:

—Gol bacaagdiajg, lëjt ragbee guial loj dxiin guie raguieen ree gan milia ro'.

²⁶ Per yan lëjt ruguiaa rigueijn tēēdi, Pab ziza cayëbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, nē guidib niz Asia.

²⁷ Dxel nadxeb yasëēb dux chiin ree, abi' ad tijbtizi dux chiin ree, nē xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xguialrniabee dios Diana, bén rën ree bejn guidib niz Asia nē guidib loj guidxliuj.

²⁸ Chi bigueijn reeman zian, bidxe'ch reeman abi' gurixdiaj reeman rëb reeman:

—¡Bén zojbloj naj Diana, xdios ree bén Éfeso!

²⁹ Abi' gurixdiaj ree bén guiedx guin wajs reeman, gunaaz reeman tio'p ree bén Macedonia,

Gayo në Aristarco, bën rzanë ree Pab. Dxel gux-oobyuj reeman laa reeman, binë reeman laa reeman lod rajc xgabilt ree bën guiedx.

³⁰ Guyën Pab niuman yagaj din ninieenëman bejn ree, per ad cwëjbt ree xcompniaraman, bën ma rliladx ree Jesucrist.

³¹ Nëtëë loj ree guxtis Asia guin no'ch bëlzi ree xmiw Pab, laa reeman guxhaal ruson lojman guial mejorli ad chu'man ni.

³² Zianz gurixdiaj ree bën guin rëb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj.

³³ Dxel galay ben zien guin babëë ree bën Israel tijb xcompniar reeman bën la Lejandr din guinieenëman bën guin ree. Dxel beenman sen loj ree bën guin din yacwëëz ro' reeman din guinieeman por ree bën Israel delant loj ree bën guiedx guin.

³⁴ Per chi gogbee reeman guial najman bën Israel, tiblazujzi gurixdiaj reeman cost tio'p hor, rëb reeman:

—¡Bën zojbloj naj Diana, xdios ree bën Éfeso!

³⁵ Dxel chi been squiarban luguiedx guin gan bacwëëz ro' reeman, dxel rëbaman:

—Bën Éfeso, gra bénguidxliuj ragbee guial luguiedx guie zianczi rniaj ree bejn xyadoo dios Diana abi' rën tëë ree bejn dios Diana biajb xanyabaa.

³⁶ Lëjt ragbee guial laan naj ni diidxli, zeel ad rayalt güündi zian, ad gontzi güündi xhienin sin xgab.

³⁷ Din b́en bidnēdi achet ni mal been reeman yadoo guin, ad wanee tēēt reeman diidxguijdx dux dios ree.

³⁸ Bal Demetrio con ree xcompniaraman b́en rŷjnnēman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman.

³⁹ Per bal xhieri mazri rēndi, chi gac xgabilt b́en guiedx dxel gacan reglad.

⁴⁰ Yan, por ni ma gojc, nadxeb na gobiarn guial dunuj ree caylu' ree bejn diidx din gŷŷn reeman wadijl guin, ¿abi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

⁴¹ Chi gulox rēbaman zian, dxel bare'ch reeman.

20

Wej Pab Macedonia nē Grecia

¹ Chi babedxe ree b́en Éfeso, gurejdx Pab b́en rliladx ree Jesucrist persi bagu'man luxdoo reeman. Dxelri bazaadiidxnēman laa reeman abi' zēman niz Macedonia.

² Bitixlojman b́en rliladx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia

³ lod guzuman choon bēēw. Ma niuman loj barcw din niejman Siria, chi gogbeeman guial nuyēn ree b́en Israel nŷjn reeman laaman xhienin. Dxel mejorli beenman xgab bayejcaman niz Macedonia.

⁴ Binēman Sópater, b́en Berea, xi'ngaan Pirro, nē Aristarco con Segundo, b́en Tesalónica ree, nētēē

Gayo, bén Derbe, con Timoteo, nē Tíquico con Trófimo, bén niz Asia ree.

⁵ Gra reeman guned abi' gulējz reeman Pab con naj Lujc guiedx Troas.

⁶ Guiáad dunujn chi gudēd lanij ni raw ree bēn Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

Basban Pab Eutico

⁷ Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenēman bejn ree,

⁸ guiáad lēnū ladya lod rado'pan dád zien ree guij re'c.

⁹ Tijb xinguiag zojb ro' ventan lax Eutico. Guial xchej da't guneenē Pab laa reeman, dxel xt garej gunaaz bacaal xin guin, abi' gudidya'x diizd yu bayon guin xt luyuj, ma güjtix chi bales reeman laax.

¹⁰ Dxel biguiajt Pab lod naga'x, bazuxibaman abi' gudiidxaman laax, dxel rēbaman loj reeman:

—Ad rdxebidi, nabanquix.

¹¹ Dxel bayē'p Pab zatijb, gula'man guiadxtil abi' gudaw reeman, dxel basnuu guneenēman laa reeman xt bareguiaal. Chi bareguiaal bayunejzaman ziaman.

¹² Abi' xin gudidya' ro' ventan guin, nabanx zignē reeman laax, dxel dád nix yu' luxdoo reeman.

Wej Pab Mileto

13 Dxel dunujn badxu'n loj barcw baneedan bio'n par luguiedx Asón, lod baya'nan diidx yaca'n Pab, din beenman xgab niej guia'man ni.

14 Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene.

15 Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio.

16 Been Pab xgab ad zejtaman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

Bazaadiidxnë Pab bejn ree Mileto

17 Chi nadxu'n Mileto, gunabee Pab bi't ree bën rniabee loj ree bën rliladx Jesucrist, bën zojb ree Éfeso.

18 Chi bidxin reeman dxel rëbaman loj reeman:

—Diisd dxej yaloy ni bialan niz Asia xt yan, lëjt ragbee xhienaag cayünan.

19 Loj guidib tiamp ni za'në'n lëjt cayünan sirv Jesucrist con pasens, majsi xt ronani abi' gra loj guialzi ma gudëedan por ni rën ree bën Israel güünnë reeman naj.

20 Per majsi zian ad bacwëëzt rnin lojdi ni naj ni zagdxe par lëjt, tant delant loj ree bejn në lidxidi balün lëjt.

21 Abi' zi'c ree bën Israel në ree bën ad najt bën Israel, ma rën loj reeman din yayüjn reeman xgab

por xtol reeman yadxi' tée loj reeman loj Dios chililadx tée reeman Dad Jesucrist.

²² Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni.

²³ Tijbzi ni ragbeen naj guial guidib lod ran rugojn xSprijt Dios naj guial ladxguiib në zro' da't guialzi naj ni cabëz naj.

²⁴ Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, gün téeen mandad ni bane Dad Jesús naj guial gatiechan xtiidxa'caman xhienaag rën Dios dunuj ree.

²⁵ 'Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguaatridi naj.

²⁶ Zeel ganin lojdi yan guial ad achetri dol ra'pan bal id nabandi xnejz.

²⁷ Din ma bagojnan lëjt gra xhienaag naj xixgab Dios achetdzi baquiechan.

²⁸ Yan, gol gojp lëjt gajc, gol gojp tée ree bën rliladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejnman ma gudixaman por xtol reeman.

²⁹ Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliladx ree Jesucrist.

³⁰ Loj gajquidi grii ree bën gulüü ganax ni rusquiee, din güün reeman gan güüncwent ree bën rliladx Jesucrist xtiidx reeman luar güüncwent reeman xtiidx Dios.

³¹ Zeel gol guzujsin, gol gojp cudad, gol basaal-
adx, loj choon ijz ad bacwëëzt gunenë'n lëjt xt

ronan banen lëjt consejw.

³² 'Yan, compniar raliduladx ree Jesucrist, gusa'nan lëjt con Dios con xtiidxza'caman. Laan rajp guialrniabee par gagnën lëjt, din gusnuu gagbeedi xhienaag rënman guibandi gunee tëëman lojdi ni ma rëbaman gudëëdaman loj ree bën ma naj xbejnman.

³³ Achut xmilia achu tëët xab rzëëbladxan.

³⁴ Lëjt ragbee zagdxe guial con quijb yan benan dxiin persi gudawnë'n bën guzu ree con naj.

³⁵ Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rëbaman: “Mazri nix yu' luxdoo bën razaladx guial loj bën rtia'.”

³⁶ Chi gulox rëb Pab zian, dxel bazuxibaman gurejdx gunabaman Dios con gra reeman.

³⁷ Gra reeman biin, gudiidx reeman Pab abi' gudaw reeman laaman xid.

³⁸ Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

21

Wej Pab Jerusalén

¹ Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara.

² Ni badxaaglojn tijb barcw ni ma che niz Fenicia zianz badxu'n lojn.

³ Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat

barcw guin luguiedx Tiro dxel badxu'n luguiedx guin.

⁴ Ni badxaaglojn b́en rliadx ree Jesucrist abi' badxu'ně'n laa reeman gajdx dxej. B́en guin ree por xSprijt Dios rěb reeman loj Pab guial ad bal cheman Jerusalén.

⁵ Per chi baza' gajdx dxej guin, dxel badxoon luguiedx guin, dxel gra reeman con xbéngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios.

⁶ Dxel bazaadiidxně'n laa reeman abi' badxě'pan loj barcw guiáad laa reeman zia lidx reemañ.

⁷ Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' t́een bugneeně'n b́en zojb ree ni, b́en rliadx ree Jesucrist abi' baya'nan con laa reeman tib dxej.

⁸ Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, b́en rtie'ch xtiidx Jesucrist. Felip guin naj tijb ree b́en gajdx cwabee din qui's reeman ni rayal tia' ree b́enprob abi' baya'nan lidxaman.

⁹ Yu' tajp xi'ndxa'paman biinxtijb ree abi' laa reem ruděed xtiidx Dios loj ree bejn.

¹⁰ Ma gojc zien dxej nadxu'n lidx Felip, chi bi't tijb b́en la Agabo nęgajcaman ruděed xtiidx Dios loj ree bejn, zěedaman niz Judea.

¹¹ Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree b́en Israel b́en naj xcinch ni guie, abi' yayü reeman laaman loj ree b́en ad najt b́en Israel.

12 Chi baguiejnan zian, dunujn con ree b́en rliadx Jesucrist luguiedx guin baguieenan naguiejn loj Pab ad cheman Jerusalén.

13 Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiétan Jerusalén por Dad Jesús.

14 Chi bayagbeen guial ad zaguieentan gan yadsoonan laaman chitëe cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

15 Chi gudöd ree dxej guin dxel baguieenan purvinid bio'n Jerusalén.

16 Bunë'n bëlzi ree b́en Cesarea rliadx ree Jesucrist, laa reeman binë dunujn lod baya'nan lidx tijb b́en Chipre, ma gojc xchej rliadxaman Jesucrist, laman Mnasón.

Bignaj Pab Jacob

17 Abi' ree b́en Jerusalén rliadx Jesucrist dád nix guyu luxdoo reeman baca' reeman dunujn.

18 Chi bareguiaal bunë'n Pab bugnajn Jacob, ni riga' gra ree b́en rniabee loj ree b́en rliadx Jesucrist.

19 Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree b́en ad najt b́en Israel.

20 Chi biguiejn reeman zian, baza't reeman Dios zagdxe, zianz rëb reeman loj Pab:

—Lüj ragbee guial entr loj ree b́en Israel zien da't reeman ma bililadx Jesucrist, abi' gra reeman rëb guial rüjn naguiejn güün bejn zi'c rniabee xley Moisejs.

21 Ma biguiejn tëë reeman guial lüj culüü bén Israel ree, bén ad zojbt ree loj nacion Israel guial ad züjncwentt reeman xley Moisejs, rëb tëël loj reeman guial ad rüjnt naguiejn chu' xi'n reeman sen ru ree bén Israel ad zinal tëët reeman dux costumbr ree.

22 Yan, ¿xhienaag gac? Laa reeman guchajgczl lasa' reeman chi gagbee reeman guial ma bi'til.

23 Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwëb reex loj Dios.

24 Binë reex, gol been zi'c rëb loj ley din gaquidi naya, gudijx tëë por laa reex din gac ya guiyc reex. Zian gagbee gra bejn guial rüjnquil zi'c rniabee ley, guial ad wali tëët ni biguiejn reeman xcwentil.

25 Abi' por ree bén ad najt bén Israel, bén ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tëë reeman rejn ni'qui bëël rberejn, ad sunë tëë reeman ben ren bén ad najt lacheel reeman.

Gunaaz ree bén Israel Pab

26 Dxel binë Pab guidap ree bén guin, abi' chi bareguiaal been reeman zi'c rniabee ley par gac reeman naya. Dxel guyu reeman lën yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinë tijb gaj reeman tijb be guiët zi'c tijb gon par Dios.

27 Chi ma yayaaloj gajdx dxej ni naj güün reeman zi'c rniabee ley, yu' ree bén Israel zëed niz Asia, baguiaa reeman Pab lën yadooro' Jerusalén

abi' gurixdiaj reeman wajs reeman, gunaaz reeman laaman,

²⁸ rëb reeman:

—¡Bén Israel, gol been yudar! Xin guie naj xin ziza gra lad caneguijdxix bén Israel ree në dux yadoo ree, rëb tëëx loj ree bejn guial ad güün reeman zi'c rniabee dux ley ree. Abi' ad tijbtzi laan, në ma badxe'x bén ad najt ree bén Israel lën dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.

²⁹ Rëb reeman zian guial baguiaa reeman Pab zizaman ni con tijb bén Éfeso bén la Trófimo, zeel gunaladx reeman binë Pab laaman lën yadooro' Jerusalén.

³⁰ Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babëë reeman laaman lën yadoo guin laa basiaaw gajc reeman port guin ree.

³¹ Za mer nugüjt reeman laaman, chi bidxin ruson guin loj suldad rniabee ree suldad guial gra ree bén Jerusalén cayüjn nadxeb.

³² Laa bato'p gajc suldad rniabee guin xsuldadix në za tio'p choon ree suldad rniabee, baxüün reex wej reex lod riga' ree bén guin. Chi baguiaa ree bén guin bidxin suldad rniabee guin con ree xsuldadix, dxel bacwëëz gudijn reeman Pab.

³³ Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidxix chu laaman xhie tëë beenman.

³⁴ Per gurixdiaj reeman rëb reeman garent garen, guial rbixdiaj da't reeman achet gojc niag-

beex, dxel gunabeex bignë reex Pab lod yu' ree suldad.

³⁵ Chi bidxin reex loj ree scliar lod yu' ree suldad guin, gulejn reex Pab guial dád nadoxh rüjn ree bén zien nal laa reex,

³⁶ abi' gra reeman rbixdiaj, rëb reeman:
—¡Gol bagüjtix!

Gunee Pab loj ree bejn

³⁷ Chi ma chu'në reex Pab lod yu' ree suldad guin, gunabdiidxaman loj suldad rniabee guin, rëbaman:

—¿Zajc ganenë'n lüj ya?

Badxi' suldad guinan rëbix:

—¿Rajc rnieel diidx grieg ya?

³⁸ ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, bén bagüjt ree bejn?

³⁹ Dxel rëb Pab lojx:

—Bén Israel naj. Goolan luguiedx Tarso tijb ree guiedx zojbloj ni riga' niz Cilicia. Baneesii mod ganenë'n bén guie ree.

⁴⁰ Dxel cwëjb suldad guin, abi' guzuli Pab loj ree scliar guin beenman sen loj ree bén guin con yaaman din yacwëöz ro' reeman. Chi bacwëöz reeman, dxel guneenëman laa reeman diidx hebreo, rëbaman:

22

¹—Lëjt bengol në los demazridi, gol bacaagdiajg ni ganin por naj.

² Chi biguiejn reeman caneenëman laa reeman diidx hebreo, mazri bacwëöz reeman. Abi' basnu-uman rëbaman loj reeman:

³ —Bén Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bén gulal ree. Guiáad naj guidib luxdon benan xgab güünan sirv Dios zi'cgajc lëjt yan.

⁴ Dxel guzunaalan bén rliladx ree Jesucrist, xt bagüjtan laa reeman abi' zi'c ree béngunaa zi'c ree xinguaaw gunaazan badxe'n ladxguiib.

⁵ Bixhioz mazri zobjloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' bén Israel ree, bén zobj ree luguiedx Damasco din chile' yaguilan bén rliladx ree Jesucrist luguiedx guin, ganaaz tēen laa reeman guidnē'n laa reeman Jerusalén din tēd reeman casti.

*Be Pab diidx xhienaag bililadxaman Jesucrist
(Hch. 9:1-19; 26:12-18)*

⁶ 'Per chi za'n lunejz par Damasco, chi ma cadxinan ni cost garol dxej, dxejczy brii tijb guij xanyabaa balaan bacha' guidibczy lod cazaan,

⁷ abi' breeyujn. Dxel biguiejnan cha' bén na: “Saulo, Saulo, ¿chexquiza zeel rzunalil naj?”

⁸ Abi' gunabdiidxan rēn: “¿Chu lüj Dad?” badxi'man laan naman: “Naj naj Jesús, bén Nazaret, bén rzunalil.”

⁹ Bén zinē' reen baguiaa reeman bacha' guin abi' bidxeb reeman, per ad bignia't reeman ni na cha' bén gunee naj.

¹⁰ Dxel gunabdiidxan rēn: “¿Xhie rayal günan Dad?” Abi' na Dad Jesucrist lon: “Bixche, basnuu

xnejzil wej Damasco. Ni na reeman gra ni rayal güünl.”

¹¹ Abi' guial bascajy bacha' guin lon, dxel bén zinë' reen gunaaz reeman yan, binë reeman naj luguiedx Damasco.

¹² 'Ni zojb tijb bén la Ananías, rüjnman cumplid gra zi'c rniabee xley Moisejs. Abi' gra ree bén Israel zojb luguiedx Damasco nünbee laaman guial nabanman xnejz.

¹³ Ananías guin bidganaj naj, chi bi'taman naman lon: “Saulo, ma zajc yaguaal stijb.” Loj hor guin gajc baguian stijb abi' baguian laaman.

¹⁴ Dxel naman lon: “XDios dux béngulal ree ma bacaabee lüj din gagbeel xhie rënman güünl, abi' guguaal Jesucrist guien tëël cha'man, bén rüjn zi'c rayal.

¹⁵ Din chigneel xtiidxaman loj gra ree bénguidxliuj, gü tëël diidx loj reeman ni baguaal ni biguiejn tëël.

¹⁶ Yan, ad rbëzil mazri, guzuli gurobnijs tëë gurejdx gaj Dad Jesucrist din chisüdaman xtolil.”

Be Pab diidx xhienaag wejman loj ree bén ad najt bén Israel

¹⁷ 'Chi baguialan Jerusalén, wan lën yadooro' persi guredx gunaaban Dios, abi' guza'can zi'c rulüü cane'xhchalan.

¹⁸ Baguian Dad Jesús naman: “Baquiejn. Cari barii Jerusalén, din ad züjncwents reeman ni guiëbil por naj.”

¹⁹ Abi' rën lojman: “Dad, laa reeman ragbee guial naj wa gra lën ree yadoo gunaazan bén

rliiladx ree lüj, badxe'n laa reeman ladxguiib gudin tēen laa reeman.

²⁰ Nē chi bagüjt reeman Esteban, bēn gunee xtiidxil, laagajc naj za' ni rēn zagdxē naj guiētaman abi' xt gunan xab ree bēn bagüjt laaman.”

²¹ Per na Dad Jesús lon: “Wej, naj gaxhal lüj zijt loj ree bēn ad najt bēn Israel.”

Badxe' reeman Pab lod yu' ree suldad

²² Xt guintzi naga'loj bacaagdiajg reeman ni rēb Pab dxel guzuloj gurixdiaj reeman rēb reeman:

—¡Ad rayalt guiban xin guin! ¡Gol bagüjtix!

²³ Abi' guial cabixdiajz cabixdiaj reeman, ruzaal xab reeman niz ladia ruzaal tēē reeman yuj niz ladia.

²⁴ Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bēn guin zian contr laaman.

²⁵ Per chi guxhii reex Pab din quin reex laaman, rēbaman loj tijb ree suldad rniabee za' ni:

—¿Zajc quindi tijb bēn Rom ya, chi gadidi gagbee xhie beenman?

²⁶ Chi biguiejn suldad rniabee guin zian, dxel bicojnx suldad rniabee ree suldad guin, rēbix lojx:

—Gojp cudad ni güünnēl xin guin, din xin Roman.

²⁷ Dxel wej suldad rniabee guin lod za' Pab, abi' gunabdiidxix lojman rēbix:

—¿Walin ya xin Rom lüj?

Badxi' Paban rēbaman:

—Walican.

²⁸ Abi' rēb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rëbaman:

—Per naj diizd goolan najn bén Rom.

²⁹ Chi bigueijn ree suldad niguin Pab, guial bén Rom najman, laa bisüd gajc reex. Xt në suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

Bazuj reeman Pab loj ree guxtis

³⁰ Chi bareguiaal, guyën suldad rniabee guin niagbeechaawix chexc zeel za' ree bén Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz në ree guxtis. Abi' babëëx Pab bazujx laaman loj gra reeman.

23

¹ Baguiaa Pab loj ree guxtis guin, abi' rëbaman:

—Compniar Israel, loj guidib ni nabanán xt yan, achet naladxan delant loj Dios din naj ragbee xhienaag nabanán.

² Dxel Ananías, bixhioz mazri zobjloj rniabee graczi ree bixhioz, gunabeeman bén za' ree gajxh cwë' Pab din ca'p reeman ro'man.

³ Per badxi' Paban rëbaman loj bixhioz guin:

—¿Ziangajc ca'p Dios ro'l, bén rusquiee! ¿Id zobjil yagaj ya par güünl guialguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

⁴ Abi' ree bén za' yagaj rëb reeman lojman:

—¿Zian rusaglojl xbixhioz zobjloj Dios ya?

⁵ Dxel rëb Pab:

—Gol been perdon, ad gogbeetan guial laaman naj bixhioz mazri zobjloj. Din loj xtiidx Dios rëb: “Ad gusaglojl bén rniabee ladxil.”

⁶ Chi gogbee Pab guial garol reeman naj bénsaducew za garol reeman naj bénfarisew, dxel guneeman rejs rëbaman:

—Naj naj bénfarisew, xi'n bénfarisew naj. Abi' guial rliladxan yaban ree bengüt zeel za' ree bejn contr naj.

⁷ Chi rëbaman zian, guzuloj cadildiidx ree bénfarisew con ree bénsaducew abi' gojc reeman tio'p lala'.

⁸ Din bénsaducew ree ad rliladxt reeman guial yaban ree bengüt, ad rliladx tëët reeman guial yu' ree anjl në ree sprijt, per ree bénfarisew rliladx reeman gra ree ni guin.

⁹ Abi' been reeman naquie' yagaj. Dxel guzuli bëlzi ree bénfarisew naj mextr rulüü ley, rëb reeman:

—Achet ni mal wayüjn bén guie. Wed tijb sprijt o tijb anjl guneel laaman, gol gojp cudad ad niad contr Diosan nadxu' ree.

¹⁰ Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëë reex laaman galay ree bén guin, chinë tëë reex laaman lod yu' ree suldad stijb.

¹¹ Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

Been reeman xgab gugüjt reeman Pab

¹² Chi bareguiaal, garol ree bén Israel baya'n reeman diidx din gugüjt reeman Pab, rëb tëë

reeman guial achet gaw reeman achet tēēt guiē' reeman xt gugūjt reeman laaman.

¹³ Nadēd tiuu naj ree bēn rēb zian.

¹⁴ Abi' wej reeman bigneenē reeman bixhioz ree bēn rniabee ree bixhioz nē ree xbengol ree bēn Israel, rēb reeman loj reeman:

—Dunujn ma raguie'ch guial achetzi yadaawan xt chi ma bagūjtan Pab.

¹⁵ Yan lējt con gra ree guxtis, gol gunab loj suldad rniabee guin din guidnēx laax lojdi guixie, con gol badxiib guiyc guial rēndi gagbeechaawidi xhien-aag naj xcwentix. Abi' dunujn ma yadxu'sinan din yagūjtan laax chi gadix gui't guie.

¹⁶ Per xi'ngaan bizan Pab biguiejnx guial cayēb reeman zian, dxel wejx lod yu' ree suldad bicojnx Pab.

¹⁷ Zianz gunee Pab tijb ree suldad rniabee guin, rēbaman lojx:

—Binēsii xin guie loj suldad rniabee din gudēēx tijb ruson lojman.

¹⁸ Binē xin suldad guin laax loj suldad rniabee guin, rēbix lojx:

—Pab, xin yu' ladxguiib guredx naj abi' gunabix guidnē'n xin guie lojl din guneex tijb ruson lojl.

¹⁹ Abi' suldad rniabee guin gunaazix yaa xin guin, binēx laax tiblād, gunabdiidxix lojx rēbix:

—¿Xhie rēnl nal lon?

²⁰ Abi' rēb xin guin lojx:

—Bēn Israel ree ma baya'n reeman diidx din guiniab reeman lojl guixie din chinēl Pab loj ree guxtis, con gudxiib reeman guiyc guial rēn reeman gagbeechaaw reeman xhienaag naj xcwentaman.

21 Per ad bal chililadxil laa reeman, din nadéd tiuu naj ree b́en cwéẓ laaman guquie'chloj reeman lunejz, abi' ma rēb reeman guial achet gaw reeman ache tēēt guiē' reeman xt gugūjt reeman laaman. Yan za'sin reeman cabēz reeman ni guiēbil.

22 Dxel rēb suldad guin loj xin guin:

—Baguiaj. Achu loj guiēbil ni ma nal lon.

Guxhaal reeman Pab loj gobernador Félix

23 Dxel gunee suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', nē za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxin.

24 Abi' gunabee tēēx güün reex porvinid way cwib Pab, rēbix loj reex guial guinia reex Pab din guidxinman zagdxe loj gobernador Félix.

25 Abi' guxhaalnēx laa reex tijb gui'ch ni rēb:

26 “Naj Claudio Lisias, rugajpdiozan lūj gobernador Félix, lūj guial najl b́en zobjloj.

27 B́en Israel ree gunaaz xin guie ma nugūjt reeman laax. Per chi gogbeen guial xin Roman, dxel wan con ree da suldadan buglēen laax loj reeman.

28 Abi' guial rēnan gagbeen xhie rūjnx zeel rdxe'ch reeman laax, dxel bazun laax loj ree guxtis Israel.

29 Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiētix ni'qui guial chu'x ladxguiib.

30 Nē guial ma gogbeen guial xixgab ree b́en Israel naj gugūjt reeman laax, zeel cayxhalan laax lojl. Abi' ma rēn loj ree b́en rdxe'ch laax guial con

lűj güün reeman reglad ni rajp reeman contr laax. Laanan rugojnan lűj.”

³¹ Been ree suldad guin zi'c gunabee suldad rniabee guin abi' guxhin bině reex Pab luguiedx Antípatris.

³² Chi bareguiaal suldad zě ree guia' bayejc reex lod yu' ree suldad, guiáad ree suldad dxiib way zině reex laaman luguiedx Cesarea.

³³ Chi bidxin reex Cesarea, baděəd reex gui'ch guin loj gobernador guin, bayü těě reex Pab lojman.

³⁴ Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zěədaman,

³⁵ dxel rěbaman lojman:

—Chi gui't ree bėn za' ree contr lűj, dxel gucagdiagan ni nal.

Abi' gunabeeman gap reex Pab lėn xpalas Herodes.

24

Ni gunee Pab loj gobernador Félix

¹ Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel ně tijb licenciad laman Tértulo. Abi' wej reeman loj gobernador guin din cwe'c reeman xguialquia Pab.

² Chi bidxinně reex Pab, guzuloj Tértulo canee-man contr laaman, rěbaman loj gobernador guin:

—Quixtěě lűj dad gobernador, por lűj nadxu'dxen, ně por xguialrajquil zien ree ni rűjn sirv cayajc du ladxan.

³ Gra ladczi za' ree bejn conform por gra ni cayüjnl dad gobernador Félix, lüj naj bén zobjloj, quixtëeczi lüj.

⁴ Per chitëë günlaan lüj mazri, rniaaban lojl din gucaagdiajguil ni yanan lojl tibrajtoczi.

⁵ Dunujn bayagbeen xin guie naj zi'c tijb guial-guijdx loj ree bén Israel, guidibczi guidxliuj zizax rustijlix laa reeman abi' laax rniabee loj tib cwaa ree bén rniee reeman nazaren.

⁶ Abi' guyën tëëx nüjnx dux yadooro'n zi'c tijb luar ad rüjnt sirv, zeel banaazan laax bayënan naguieenan guialguxtis zi'c naj dux leyan.

⁷ Per laa bi't gajc suldad Lisias con ree xsuldadix, babëëxuu reex laax du lojn.

⁸ Abi' rëb suldad rniabee guin guial lojl gui't ree bén rbe'c xguialquia Pab, yan lüj gajc zajc guini-abdiidx lojx din gagbeel zagdxë guial walican ni ranan xcwentix.

⁹ Abi' ree bén Israel za' ni rëb reeman guial waliqui gra ni guin.

¹⁰ Dxel been gobernador guin sen loj Pab din guinieeman, abi' rëb Pab:

—Guial ragbeen diizd gocli rniabeel nacion Israel, zeel ad yu'nawëëgtan yadxi'n ni rudxiib reeman guican.

¹¹ Abi' lüj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios.

¹² Abi' achut banaaznë reeman naj cadildi-idxnë'n, ni'qui guial gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguiedx guin.

13 Bén guie ree ad zajct na reeman lojl guial ni diidxli naj ni rudxiib reeman guican.

14 Per ni naj diidxli naj guial rliladxan Jesucrist, nejzcüb guin naj ni zinaalan, cayünan sirv loj xDios dux béngulalan, abi' na ree bén guie guial ad xnejzt Diosan, per cayünan zian guial rliladxan gra ni zëed loj ley në ni bacaa ree bén badëed xtiidx Dios loj ree bejn.

15 Abi' zi'cgajc rliladx ree bén guie Dios, ziangajc rliladxan laaman guial yaban ree bengüt stijb, zi'c ree bén goc benza'c në ree bén goc benmal.

16 Zeel rünan naguiejn gabajnan zagdx chitëe xhie ganaladxan delant loj Dios ni'qui delant loj ree bejn.

17 'Ma gojc zien ijz nariin, xt yan baye'c ladxan bidganë'n ni baxhaal ree bejn par ree bénprob, bidganë' tëen gon ni rayal gudëdan loj Dios.

18 Laan naj ni cayünan lën yadooro' Jerusalén chi bi't ree bén Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëetan wadijl.

19 Yan, bén gunaaz ree naj, laa reeman naj bén rayal su guie din na reeman xhie rünan xhie pornin rdxe'ch reeman naj.

20 O balguiza, bén za' ree guie na reeman xhie da dolan badxejl reeman chi guzun loj gra ree guxtis Israel.

21 Tijbzi ni benan chi za'n galay reeman gurix-diajn rën: “Guial rliladxan yaban ree bengüt, zeel za' ree bejn contr naj yan.”

22 Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel

basa'nman guialquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxe xhienaag naj xcwentidi.

²³ Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tée reex chignaj ree xmiwaman laaman.

²⁴ Chi goc tio'p choon dxej, bidxin gobernador Félix stijb con lacheelaman Drusila, laaman naj bën Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliladx bejn Jesucrist.

²⁵ Per chi guzuloj cayëbaman guial rayal guiban ree bejn xnejz, gucwëez tée xixgab mal reeman, guial guidxin tée dxej yadëed ree bejn cwent loj Dios, dxel dád bidxeb gobernador guin abi' rëbaman loj Pab:

—Baguiaj. Ganetan lüj chi chu'n luar stijb.

²⁶ Per Félix në milian rbëzaman gudëed Pab lojman din guslaaman laaman, zeel gurejdxaman laaman zien volt din guinieenëman laaman.

²⁷ Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree bën Israel, zeel basa'nman Pab ladxguiib.

25

Gunee Pab loj Festo

¹ Chi goc choon dxej ni bidxin Festo Cesarea par chu'man guial gobernador, dxel wejman Jerusalén.

² Yagaj, bixhioz rniabee ree bixhioz con ree b́en Israel mazri zojbloj, wej reeman lojman bile'c reeman xgualquia Pab,

³ abi' gunab reeman lojman din guixhiaalaman Pab Jerusalén. Zian guyèn reeman din xixgab reeman naj gugüjt reeman Pab runejz.

⁴ Per badxi' Festo xtiidx reeman rëbaman gual Cesarea nayaaw Pab guiáad laaman nayob yagua-jman ni,

⁵ abi' rëbaman loj reeman:

—Bén rajp ree gualrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

⁶ Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab.

⁷ Chi bidxinnë reex laaman, b́en Israel guza ree Jerusalén, gubig reeman abi' zien ree niguijdx badxiib reeman gujcaman, majsi ni'qui tijb ni rëb reeman ad gojct nulüü reeman gual najn ni wali.

⁸ Dxel badxi' Pab xtiidx reeman, rëbaman:

—Naj, achet ni mal wayünan xley ree b́en Israel, ni'qui yadooro' Jerusalén, ni'qui rey César.

⁹ Per Festo guyènman naya'nman zagdxe loj ree b́en Israel, dxel gunabdiidxaman loj Pab, rëbaman:

—¿Rènl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

¹⁰ Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüj ragbee zagdxe gual achet ni mal wayünan b́en Israel ree.

11 Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

12 Dxel chi gulox guneenë Festo bën naj ree xbejnman, bën rëb ree ni rayal gac, rëbaman loj Pab:

—Lüj na tädil loj rey César, yan lojman tädil.

Za' Pab loj rey Agripa

13 Chi gudöd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo.

14 Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguiib.

15 Chi wan Jerusalén, bixhioz rniabee ree bixhioz con ree bën rniabee loj ree bën Israel gule'c reeman xguialquiax, gunab reeman ganabeen guiëtix.

16 Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bën cabe'c xguialquiaman din guiëbaman walin ya o ad walitan ni rudxiib reeman guijcaman.

17 Zeel chi bi't ree bën Israel guin guie, achet guial niaglaan, bareguiaal gajc gure loj da yagxhilan, abi' gunabeen bidnä reex xin guin.

18 Per ree bën bi't gule'c xguialquiax, achet ni nadxeb na reeman zi'c gunaladxan ninia reeman por laax.

¹⁹ Tijbzi xgualqui ax ni gule'c reeman naj por xcostumbr reeman në por tijb bën la Jesús, bën ma güjt, per Pab rëb naban Jesús guin.

²⁰ Abi' guial ad ragbeetan xhie günan por zian, dxel gunabdiid xan loj Pab bal rën x che x Jerusalén din gac reglad ni guin ree ni.

²¹ Per laax gunab täd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

²² Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiajguil laax.

²³ Chi bareguiaal, dád zagdx e ca' xab rey Agripa con Berenice bidxin reeman con ree bën rniabee suldad con los demazri ree bën zojbloj luguedx guin, bidxin reeman guyu reeman lënü lod gucaagdiajg reeman ni guiëb Pab. Dxel gunabee Festo bica' reex Pab.

²⁴ Abi' rëb Festo:

—Rey Agripa në los demazridi dad za'nëdi dunujn guie. Bën ruguiaadi guie, gra bën Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix.

²⁵ Naj, achet xfaltix radxejlan guial rayal guiëtix. Guiáad laax gunab täd loj César Augusto lod gac reglad xcwentix, abi' ma benan xgab yaxhalan laax.

²⁶ Per ad radxejl tan ni gucan por laax loj gui'ch ni gaxhalan loj rey César, bën rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiid xidi ni rayal guiniabdiid xidi loj x dxel ma yu' ni gucan por laax.

²⁷ Din naj rulüü ad xnejzt naj yaxhalan tijb bën yu' ladxguuib loj rey César abi' ad zëtan xhie beenman.

26

Ni gunee Pab loj rey Agripa

¹ Dxel rëb rey Agripa loj Pab:

—Ma zajc guinieel por lüj.

Abi' gules yaa Pab guzuloj rëbaman:

²—Dád nix yu' luxdon guial bile' za'n lojl yan rey Agripa, par ganen lojl yadxi' tēen gra ni rudxiib ree bën Israel guican.

³ Din lüj ragbee zagdxe gra xcostumbr ree bën Israel, nē conin rüjn persi rdildiidx reeman. Zeel rniaaban lojl gapil pasens gucaagdiajguil ni ganin.

Zi'c guban Pab gocli

⁴'Gra ree bën Israel ragbee xhienaag gubajnan con laa reeman zi'c ladxan zi'c Jerusalén, diizd xindoon.

⁵ Ragbee tēe reeman abi' zajc na reeman laan bal rēn reeman, guial diizd xindoon najn bēnfarisew, abi' ree bēnfarisew naj bēn mazri zinal xley ree bën Israel.

⁶ Abi' yan za'n guie, badēed reeman naj loj ree guxtis guial rliladxan yasban Dios bengüt ree zi'c beenman promejs loj ree dux bēngulal ree.

⁷ Gra guidxiptio'p cwa' ree bën Israel cabēz dxej güün Dios zian, zeel rēn reeman laaman rüjn tēe reeman sirv lojman dxej guiaal. Abi' yan guial rliladxan laan zeel rbe'c ree bën Israel da guialquian, rey Agripa.

⁸ ¿O naladxidi ya nawëëg yasban Dios bengüt ree?

Be Pab diidx xhienaag guzunalaman bën rlliladx ree Jesucrist

⁹ 'Guia'xchej benan xgab rayal günan xhienin bën rlliladx ree Jesús, bën Nazaret,

¹⁰ abi' zian benan Jerusalén. Con xtiidx ree bixhioz rniabee ree bixhioz, zien ree bën rlliladx Jesucrist badxe'n ladxguiib. Abi' chi rugüjt reeman laa reeman, në naj rë guiëtri reeman.

¹¹ Zien volt benan laa reeman xhienin din günan naguiejn gusa'n reeman guialrlliladx reeman Jesucrist. Zian benan lën gra ree yadoo, abi' guial tant rdxe'chan laa reeman dxel guzunaalan laa reeman xt luguedx ren ree.

Be Pab diidx stijb xhienaag bililadxaman Jesucrist

(Hch. 9:1-19; 22:6-16)

¹² 'Abi' par zian za'n Damasco, con quijb xtiidx ree bixhioz rniabee ree bixhioz.

¹³ Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bën zinë'n.

¹⁴ Abi' dugraczan bareeyuj, dxel biguiejnan cha' bën gunee naj con diidx hebreo, naman: “Saulo, Saulo, ¿chexc zeel rzunalil naj? Lüj gajc rguuil xguialnaal zi'c go'n rudxegua' loj yag rulaagnë reeman laab.”

¹⁵ Dxel rën: “¿Chu lüj Dad?” Badxi'man laan naman: “Naj naj Jesús bën rzunalil.

16 Per bixche, guzuli, din balülön lojl par güünl naj sirv gü tēēl diidx ni baguiaal yan nē ni gulün lojl.

17 Naj gaxhal lüj loj ree bēn Israel nē loj ree bēn ad najt bēn Israel, abi' naj gagnē' lüj chitēē xhie güün reeman lüj.

18 Gaxhalan lüj loj reeman din guixhialil loj reeman gusa'n reeman nejz mal, chinal reeman nejz zagdxē. Ad tiēbri reeman nabee xindxab laa reeman, chinal tēē reeman xnejz Dios. Abi' chililadx reeman naj din gac xtol reeman perdon yayal tēē reeman ni rayal gra ree xbejn Dios, bēn ma naya ree delant lojman.”

Bazoob Pab diidx ni balüüloj lojman

19'Zian gojc, rey Agripa, bazoban diidx benan ni na Jesucrist lon chi guneeman naj diidx xanyabaa.

20 Yaloj luguiedx Damasco gutiechan xtiidxaman, dxelri Jerusalén nē guidib niz Judea nē loj ree bēn ad najt bēn Israel. Rēn loj reeman din yayüjn reeman xgab por xtol reeman, yadxi' loj reeman loj Dios güün tēē reeman ni rayal güün reeman din guiguien guial ma bidxaa mod naban reeman.

21 Abi' por zian, gunaaz ree bēn Israel naj lēn yadooro' Jerusalén, guyēn reeman nugüjt reeman naj.

22 Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree bēn zojbloj zi'c ree bēn ad zojblojt. Abi' gra ni rēn loj reeman naj ganax ni bacaa ree bēn badēē xtiidx Dios loj ree bejn nē ni bacaa Moisejs xhienaag naj ni gac,

23 guial Cristo naj guial tédaman guialzi, guiétaman. Per chi ma güjtaman yaloj laaman naj bèn yaban loj ree bengüt, abi' gugojnman bèn Israel ree nè ree bèn ad najt bèn Israel xhienaag gap reeman perdon.

Nuyën Pab nililadx Agripa Jesucrist

24 Chi cayëb Pab zian, dxel guididxa' Festo rëbaman:

—¡Rajcguijquil Pab! guial tant rusiidil ma rajc guijquil.

25 Per badxi' Pab laan rëbaman:

—Ad guictan rajc, gobernador Festo. Ni canin najn xnejz nè diidxli.

26 Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbee chaaw guial laaman ragbee gra ni canin, din ad canitan ni goc ralan lod achut zajc gagbee laan.

27 ¿Rliladxil ni rëb ree bèn badëed xtiidx Dios loj ree bejn ya, rey Agripa? Naj ragbee guial rliladxil.

28 Dxel badxi' rey Agripa laan rëbaman:

—Sta'nczi nüjnl naj gan nililadxan Jesús.

29 Abi' rëb Pab:

—Majsi sta'nz o majsi ryaadxri, na Dios guial ad tijbtzi lüj, nè gra ree bèn cucaagdiajg ni canin yan, guidxin dxej chililadxidi Jesús zi'c naj, majsi ad nët ree caden guie.

30 Dxel bisu rey Agripa con gobernador Festo con Berenice nè gra ree bèn zojbnë laa reeman ni.

31 Chi bariica reeman tiblax guzulox cayünë lasa' reeman diidx, rëb reeman:

—Achet wayüjn xin guie ni rayal guiëtix, o chu'x ladxguiib.

³² Dxel rëb rey Agripa loj Festo:
—Zile' naslaa reex, balidix niniab tédix loj rey César.

27

Baxhaal reeman Pab Rom

¹ Chi rëb reeman ma yaxhaal reeman dunujn Italia, dxel bayü reeman Pab con sta'n ree bën yu' ladxguiib loj tijb suldad rniabee la Julio, laax rniabee tib cwaa ree suldad la Augusto.

² Abi' Cesarea badxu'n loj tijb xbarcw ree bën Adramitio, barcw ni ma grii chen guiedx riga' ree niz Asia. Në Aristarco bunë'n, bën Tesalónica, guiedx riga' niz Macedonia.

³ Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëéd reeman ni ryaadxaman.

⁴ Chi badxoon Sidón badiaawan Chipre yuj riga' loj nijsdoo, basa'nanan dux ladruvéjsan chitéë yachaaglojn zro' bi, din niz du lojn rliaj bi guin.

⁵ Badüüdan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

⁶ Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn.

⁷ Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo.

⁸ Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

⁹ Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab,

¹⁰ rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

¹¹ Per suldad rniabee guin mazri beencwentix bën rusa barcw guin në bën naj xbarcw laan, guial loj ni rëb Pab.

¹² Abi' guial ad zagdxet tëtët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan nagueijn yadxinan Fenice, tijb guiedx nulen Creta lod ad rbi' tëtët bi, ni yadüüdan tiamp nayaag.

Gubi' tijb bidoxh loj nijsdoo

¹³ Dxel guzuloj cabi' tijb bi chaawladx ni zëäd lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta.

¹⁴ Per ad wayajct xchej zio'n chi birii tijb bidoxh la Euroclidón loj nijs guin.

¹⁵ Abi' guzuloj bi guin culadxaan barcw guin. Në guial niz du lojn zëäd bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunujn niz lod cucadxaa bi guin laan.

¹⁶ Dxel badüüdan xijch tijb yujdobëz la Clauda riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin.

17 Dxel chi gulox balë'pan canu guin loj barcw guin, batiejl reeman duu lad barcw guin chitëe yaze'nan. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin din cwentzi chinë barcw guin dunujn niz lod rucadxaa bi guin laan.

18 Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin.

19 Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin.

20 Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad nagueentri du luxdoon yalaan loj nijs guin.

21 Abi' guial ma gojc zien dxej ni achetzi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëet nasëeb ree.

22 Per achet güünan, ad rdxebidi din ni'qui tijbidi ad zëjtt, tijbzi barcw guin yaze'n.

23 Din Dios rniabee naj, bën cayünan sirv guxhaal tijb xi anjlaman balüüloj lon yan guiaal.

24 Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zëed loj barcw guie ad zuslaat Dios guiët reeman.”

25 Zeel yan dad, gol badxe' luxdoodi zagdxe, din naj rliladxan Dios, ragbee tëen zagdxe guial gac zi'c na anjl guin lon.

26 Per gag barcw guie niz ro' tijb yuj riga' loj nijsdoo.

27 Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zē barcw guin loj nijs guin por bi guin. Abi' ree bēn nulen barcw guin, guxhinzii zi'ct garol guiaal gogbee reeman guial zamer yadxinan loj yuj.

28 Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit.

29 Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guiib loj nijs guin din chile' sudxe barcw guin, abi' ma rēn nejzdoo reeman yareguiaal.

30 Bēn nulen ree barcw guin, been reeman bēn sta cuzaal ree ganch guiib guin loj nijs guin niz loj barcw guin, naabzi par calet reeman canu chu' reeman par guxüün reeman.

31 Per bagojn Pab suldad rniabee con ree xsuldadix, rēbaman loj reex:

—Bal id ree bēn guin yaya'n loj barcw guie, ad zalaatridi.

32 Dxel batüüg ree suldad guin ni naxii canu guin persi zinē nijs canu guin.

33 Chi ma cayni luyuj, rēb Pab loj reeman din gaw reeman, rēbaman loj reeman:

—Ma gojc chiin gubijdx ni ad raayējstidi achet tēēt wayawidi.

34 Naj rni lējt, gol gudaw din guibandi, din gradi ni'qui tijb guidxguijquidi ad zusēēbtidi.

35 Chi rēb Pab zian, cwa'man tijb guiadxtil, abi' badēēman quixtēē loj Dios niz loj gra reeman, dxel gula'man guiadxtil guin guzuloj cayawaman.

36 Dxel bayu luxdoo gra reeman, guzuloj nĕgajc laa reeman cayaw.

37 Tio'pgayuu gayojnchiibixho'p nayajc dugran zio'pan loj barcw guin.

38 Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

Bize'n barcw loj nijsdoo

39 Chi bareguiaal, bĕn nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx gadĕöd ro'n, abi' been reeman xgab badxig reeman barcw guin yagaj.

40 Dxel batüüg reeman ni naxiinĕ ree ganch guiib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiĕc reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin.

41 Per wĕĕztiejn loj üx zien lod bigagan. Niz guijcan wĕĕz lĕn üx abi' ni'quid rniibtan, guiáad niz xan guin guzuloj cayze'nan con gojl rliaj nijs guin ladan.

42 Dxel nuyĕn ree suldad guin nugüjt reex bĕn prejs guin ree, chitĕĕ nixoobnijs reeman abi' nuxüün reeman.

43 Per suldad rniabee guin ad cwĕjbtix niajc zian guial ad rĕntix niĕjt Pab, dxel gunabeex guial bĕn rajc rxoobnijs ree, yaløj laa reeman chu' loj nijs guin güün reeman nagueijn yarii reeman ro' nijs guin.

⁴⁴ Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

28

Bidxin Pab Malta

¹ Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs.

² Bén naj ree bén ni, dád benza'c gojc reeman con dunujn. Been reeman tijb bajl guial nayaag nētēē guial cayal guia, abi' na reeman du lojn din yubiigan cwē' bajl guin.

³ Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëël lēn yag guin por xi xliaa bajl guin, abi' gudawya'b yaa Pab nalbēztib yaaman.

⁴ Chi baguiaa ree bén Malta guin nalbēz bëël guin yaa Pab, dxel rēb loj lasa' reeman:

—Xin guie bejn bagūjtix, zeel majsi gulaax loj nijsdoo, per guiētczix por ni beenx.

⁵ Per gudxijp yaa Pab abi' biajb bëël guin loj bajl guin, guiáad laaman achet gocaman.

⁶ Gra reeman cabēz saaguij yaaman, o dxejl-czi yabaman guiētaman. Per chi gojc xchej, chi baguiaa reeman achet gocaman, bachaa xixgab reeman abi' guzuloj rēb reeman guial tijb dios najman.

⁷ Gajxh lod badxu'n naga' ree xguidxliuj tijb bén zojbloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tēē gojcaman con dunujn.

⁸ Nadxel naga' xdadaman, ragxuuman, yu'man xliaa rajc tēēman yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman.

⁹ Chi gogbee ree bēnragxuu zojb ni ni goc, bi't reeman lod za' Pab persi bayūjnman laa reeman.

¹⁰ Dxel dád zien ni bazaladx reeman du lojn por zian. Abi' chi badxu'n loj barcw par yadxoon yagaj, banee reeman gra ni rayaadxan lunejz.

Bidxin Pab Rom

¹¹ Choon bēēw badxu'n loj yuj zii, dxelri badxu'n loj tijb barcw Alejandría, ni bitēd ni tiamp nayaag. Niz lucwaj barcw guin ca tio'p ree dxan bēn la ree Cástor nē Pólux.

¹² Dxel badxinan tijb guiedx la Siracusa, yagaj badxu'n choon dxej.

¹³ Abi' yagaj badxoon bio'n gadēd ro' nijsdoo xt badxinan guiedx la Regio. Chi bareguiaal, chi badxoon yagaj, brii tijb bi lad sur dxel ni barojp dxej badxinan luguiedx la Puteoli.

¹⁴ Yagaj badxaagan tio'p choon ree bēn naj ree bēn ni nē reeman rliladx Jesucrist, dxel na reeman du lojn yaya'nnē'n laa reeman abi' baya'nnē'n laa reeman toxman. Zian gojc, dxelri zio'n Rom.

¹⁵ Guiáad ree dux compniaran bēn rliladx ree Jesucrist, bēn zojb ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio nē luguiedx la Tres Tabernas. Chi baguiaa Pab laa reeman, babaaman abi' badēēman quixtēē loj Dios.

16 Chi badxinan Rom, dxel bayü suldad rniabee guin bén prejs guin ree loj tijb ree suldad rniabee ni. Per cwëjb reeman gurej Pab stijb yu ren lod gojp tijb suldad laaman.

Gunee Pab xtiidx Jesucrist Rom

17 Chi goc choon dxej badxinan Rom, gurejdx Pab bén Israel zojbloj ree ni. Chi badxajg lasa' reeman, dxel rëbaman loj reeman:

—Compniar Israel, achet wayünan contr ree bén Israel ni'qui contr xcostumbr ree dux béngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom.

18 Abi' ree bén Rom guin chi gulox badëdan cwent loj reeman, dxel nuyën reeman nuslaa reeman naj, guial gogbee reeman achet benan par guiëtan.

19 Per ree bén Israel guin badxoon reeman abi' zagdxeli gunaaban gadëdan loj rey César, per ad guial ra'ptan xhienin contr ree bén Israel.

20 Zeel guredxan lëjt, din guidganajdi naj din ganin lojdi guial por ni rliladxan guial yaban ree bengüt zi'cgajc rliladx gra ree du lasa' bén Israel ree, zeel naxiin con ree caden guie.

21 Dxel rëb reeman lojman:

—Dunuyn ni'qui tijb xtiidx ree bén Judea ad waca'tan lod na reeman xcwentil, në ni'qui tijb bén duladx ree bén raza ree Judea achet wana reeman du lojn contr lüj.

22 Per rayënan yaguiejnan xhienaag naj xixgabil, din dunuyn rayagbee guial gra ladczi rníee reeman contr religion cüb guin.

²³ Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadxge guneenëman laa reeman xhienaag naj xguialrniabee Dios. Beenman naguiejn chililadx reeman Jesús, baza't tēëman lod rníee xcwent Jesús loj xlibr ley Moisejs në ni bacaa ree bën badëë xtiidx Dios loj ree bejn.

²⁴ Yu' reeman bililadx ni rëb Pab, per yu' reeman ad bililadxt.

²⁵ Abi' guial ad rdxagt gü reeman diidx, guzuloj bare'ch reeman. Dxel rëb Pab loj reeman:

—Waliqui ni rëb Isaías bën badëëd xtiidx Dios loj ree dux bëngulal ree guial rëb xSprijt Dios:

²⁶ Wej, güjdx loj ree bën guin:

Majsi rigujen reeman, per achetczi chignia' reeman,
abi' majsi ruguiaa reeman, per rulüü ad ruguiaat reeman.

²⁷ Din been luxdoo reeman gojl,
abi' rüjn reeman zi'c rulüü ad ruguiaat reeman,
ad rigujen tēët reeman, chitëë guguiaa reeman,
abi' guien reeman chignia' tēë reeman.
Din ad rënt reeman gui't reeman con naj,
abi' günan laa reeman perdon.

²⁸ Zeel gol gogbee guial diizd yan, loj ree bën ad najt bën Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

²⁹ Chi gulox rëb Pab zian, dxel zia ree bën Israel guin, cadildiidxnë lasa' reeman.

³⁰ Tio'p ijz gurej Pab ni, yu lod gudixaman. Ni rníeenëman gra ree bën rtixloj laaman.

³¹ Sin guialrdxeb rëbaman loj reeman xhienaag naj xguialrniabee Dios, abi' guneeman xtiidx Dad Jesucrist loj reeman sin guial chu nudxoon.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

fb4ebcb8-e1f4-5bfc-b08c-f590e137d86d